

ル 5
1353
2




門 九 五 八
號 1353
卷 2



直隸全圖 統計十府六直隸州

保定府 清苑 滿城 安肅 定興 新城 唐
高陽 望都 容城 完 蠡 祁州 東鹿 博野
新安 承德府 灤州 建平 赤峯 朝陽 永平府 盧龍 撫寧
樂亭 臨榆 灤州 河間府 河間 獻 肅州 任 撫寧
東光 天津 南皮 青 靜海 滄州 景州 吳橋 任
故城 靈壽 藁城 鹽山 慶雲 滄州 景州 吳橋 任
元氏 晉州 藁城 平山 無極 行唐 順德府 邢臺
贊皇 和 平 鹿 新樂 阜平 行唐 順德府 邢臺
廣安 唐山 內丘 鉅鹿 廣平府 永年 曲周 肥鄉 鄉
成安 威 大名府 元 城 東 大名 長 南樂 廣平 肥鄉 鄉
清河 磁州 大名府 豐 城 東 大名 長 南樂 廣平 肥鄉 鄉
城西 懷安 龍門 懷來 蔚州 蔚州 蔚州 蔚州 蔚州
涿水 懷安 龍門 懷來 蔚州 蔚州 蔚州 蔚州 蔚州
廣昌 冀州 南宮 武 新 衡 棗 趙州 柏鄉 臨城 晉 深州
武強 冀州 南宮 武 新 衡 棗 趙州 柏鄉 臨城 晉 深州
陽安 定州 深澤

直隸全圖 統計十府六直隸州



直隸境衆水歸合表

濡水	濕水	漳水	漳水支盧水	祁夷水	白澗水	易水	涿水	陽樂水	沙水	汶水
滹水	沽水	滏水	元水	清夷水	紫石溪	源泉水	涇水	被陽樂	滋水	沸水
衛水	衛水	聖水	汶水北	與州河	于延水	水督元	渾塘溝	張甲河	水舊吳	雷水
白狼水	淨沱河	衛水	流	宜孫河	溫泉水	溝水	水	鹽河	海	改派水
參柳水	老漳河	胡盧河	清河	執河	廣陽水	桃水	胡盧河	合活河	鴻上水	
下官水	清河	倒流河	鐵門關	涿水	涿水	涿水	涿水	陽源水	盧奴水	涿水
清水	西韓河	嵩陽河	河	王帶河	一名巨	倒流河	清河	馬弱水	唐池水	一名沮
灤河	恆河	恆河	激河	子牙河	馬河	沙河	沙河	恆水	水今名	
屯氏河	長河	長河	水	子莊溪	水			龍泉水	槐河	
陽河	女思谷	水	水	水				長星溝	盧水	
湯河	水	水	水	水				祁水		
石河	水	水	水	水						
海	運河	滹沱河	衛河	灤河	濕水	易水	濡水	漳水	沽水	沁水
	博水									

乾隆府廳州縣圖志卷二

賜進士及第翰林院編修充 國史館纂修官 臣 洪亮吉撰

直隸布政使司

保定府 衝繁疲難

原額人丁四十一萬八千四百九十九 又滋生人丁五千一百六十二

禹貢冀州之城周屬幽州春秋戰國屬燕秦屬土谷郡漢屬涿郡晉為范陽國地後魏為高陽郡地隋為河間郡地唐為莫州地五代晉天福初割屬契丹始分置泰州開運二年收復州尋廢仍為莫州地宋建隆元年始分莫州地置保塞軍太平興國六年升為保州政和三年賜名清苑郡屬河北西路金天會七年升保州為順天軍節度屬中都路元太宗十一年始升順天軍為順天路置總管府至元十二年改為保定路屬中書省明

洪武元年改保定府隸北平行中書省七年隸北平布政使司
永樂後直隸京師

本朝初為巡撫治後改為總督部院及布政使司按察使司治
所分巡清河道亦駐此理事通判駐易州管河通判駐子牙河

府境

八到

東至河間府任邱縣界一百十里
西至定州曲陽縣界一百六十里
南至順天府新河縣界三百里
北至順天府房山縣界一百九十里
東南至冀州治三百四十里
西南至正定府晉州治二百二十五里
東北至順天府霸州治二百十里
西北至宣化府蔚州治四百里
自府治至京師三百五十里

土貢

鐵 絹 綢 芙蓉 蟾酥 黃芽菜

管縣十五州二

清苑 滿城 安肅 定興 新城 唐 博野 望都

容城 完 蠡 雄 祁州 束鹿 安州 高陽

新安

清苑縣

衝繁疲難郭下

有寶直錢局馬驛一保安一鎮巡檢駐張登

漢置樊輿廣望二縣俱屬涿郡後漢二縣皆省入北新城晉復
置樊輿縣尋省改置樂鄉縣後魏太和元年分新城置清苑縣
改樊輿置扶輿縣又析置永甯縣與樂鄉縣俱屬高陽郡北齊
省樊輿北新城清苑樂鄉四縣入永甯仍改曰樂鄉隋開皇十
八年又改曰清苑屬河間郡唐武德四年改屬滿州貞觀七年
還屬瀛州景雲二年改屬莫州五代晉初入契丹置泰州開運
二年克復仍廢為清苑縣宋建隆元年于縣置保塞軍太平興
國六年改軍置保州仍改縣曰保塞為州治金大定十六年復

曰清苑

盧水今名清苑河在縣南源出滿城縣一畝雞距二泉東南流繞府城南又東與方順河合亦名沈水班固云北平縣又有盧水亦至高陽入博河又濡水今名方順河自完縣發源曰祁水東南流逕滿城縣界為方順河又東至縣南為石橋河與盧水合張晏云濡水于曲逆城北曲而西流故曰曲逆圖經後以其名不美改曲為方改逆為順按古濡水有二方順河為南濡其北濡即北易在今易州界下流為定興縣之沙河樊輿故城及漢樂鄉故城在縣東南廣望故城在縣西南廣養城在縣東六里柏陵城在縣南清涼城在縣西南壁陽城白城並在縣西南三十里千里長堤起縣境訖河間府獻縣之臧家橋綿亘順天保定河

間三府境長千餘里

本朝康熙三十七年發帑修築雍正三年復修

滿城縣衝東南至府四十里有涇陽驛拱辰一鎮涇陽店

漢置北平縣屬中山國後魏孝昌中屬北平郡興和二年分置永樂縣屬南營州樂良郡北齊屬昌黎郡後周省永樂縣改北平縣曰永樂隋屬上谷郡唐屬易州天寶元年改曰滿城以縣北故滿城為名五代晉天福初入契丹屬泰州開運初還屬晉徙泰州治此州尋廢縣仍屬易州宋景德中省入保塞縣金大定二十八年復置滿城縣屬保州

抱陽山在縣西南

徐水源出易州五回嶺東南流逕縣北又東逕清苑縣北及安州界合清苑石橋二河班固云北平縣徐水東至高陽入博又

滄河在縣西北十五里魚水在縣西南東流注蒲水

北平故城在縣北永樂故城在縣西北魚條山下

安肅縣衝南少西至府五十里有馬驛一

戰國時燕武遂邑漢置北新城縣屬中山國後漢屬涿郡晉屬高陽國後魏曰新城屬高陽郡永熙二年僑置南營州五郡十一縣北齊惟留昌黎郡領新昌縣隋開皇元年州移三年郡廢十八年改新昌曰遂城屬上谷郡唐屬易州五代周分置梁門口寨宋太平興國六年以遂城縣置威虜軍又以梁門砦置靜戎軍并置靜戎縣爲治景德元年改威虜爲廣信靜戎爲安肅宣和七年廢安肅軍爲安肅縣尋復爲軍仍治安肅縣金天會七年改廣信軍爲遂州安肅軍爲徐州俱屬河北東路天德三年改徐州爲安肅州徐郡軍貞元二年號遂州爲龍山郡俱改

屬中都路泰和四年廢遂州爲遂城縣屬保州貞祐二年復置遂州元至元二年省遂州入安肅州後復置遂州俱屬保定路明初廢遂州入安肅州洪武六年又降州爲縣仍屬保定府龍山在縣西羊山在縣西四十里宋咸平元年田敏敗契丹于羊山卽此

南易水一名電河自易州流入逕縣北門外又東南逕容城安州至新安縣西南與依城河合爲長流河班固云北新城縣桑欽言易水出西北東入滄又曹河在縣南三十里東南至安州入徐水

北新城故城在縣西南二十里遂城故城在縣西

長城在縣西北二十五里戰國時燕趙分界處桑邱城在縣西

南徐城在縣東

定興縣

衝繁南少西至府一百二十里

有馬驛一

秦置范陽縣漢屬涿郡晉屬范陽國後魏屬范陽郡隋開皇初改曰道縣屬上谷郡唐初廢入易縣金大定六年始改置定興縣屬涿州元屬易州明洪武六年改屬保定府

涑水一名巨馬河自易州涑水縣流入南逕縣西至縣南為白溝河又東南逕容城新城雄縣入順天府保定縣界又督亢溝水今名馬村河亦自涑水縣流入又逕新城縣西注巨馬河

易水在縣西南自易州流入與巨馬河合又濡水在縣西亦自易州流入與易水合今名沙河

范陽故城在縣南

長安城在縣西北二十五里百樓城在縣西南二十五里

新城縣 衝繁西南至府一百五十里 有馬驛一巨河一鎮

戰國時燕督亢地漢置新昌縣屬涿郡後漢省唐大歷四年分固安縣地復置新昌縣太和六年又析置新城縣皆屬涿州五代晉入契丹宋時與遼分界于此宣和四年歸宋賜名威城尋入金復曰新城元太宗二年改新秦州七年復為新城縣屬大都路十一年屬順天路至元二年屬雄州明洪武六年改屬保定府

聖水今名流離河在縣東自涿州流入紫泉河在縣西舊南流遶縣城入高橋窪今改入流離河斗門河源出縣西北二十里即宋何承矩闢斗門興水利處又故渾河在縣東三十里舊自順天府固安縣分枝流入逕雄縣東北界入霸州自明以來遷徙無定

本朝順治十年水大漲由固安之故城村南決汎濫縣之東北

下人雄縣康熙十一年復歸固安三十七年永定河功成始不復入縣境

新昌故城在縣東三十里

古燕城在縣西北十四里

唐縣簡東少北至府一百二十里

有馬驛一赤岸軍城二鎮周家鋪一堡巡檢二駐河口及北羅

春秋燕唐邑戰國屬中山漢置唐縣屬中山國後魏屬中山郡北齊省入安喜縣隋開皇十六年復置屬博陵郡唐屬定州五代梁開平三年改曰中山後唐同光初復故晉改曰博陵漢初復故宋屬中山府元屬保定路明屬保定府

堯山在縣北班固云唐縣堯山在南又望都山在縣東北張晏云望都縣堯山在北堯母慶都山在南登堯山見都山故以為

名大茂山在縣西北太平御覽北嶽恒山一名大茂山與契丹分界

鴻上水在縣西北東南流入滹水又馬溺水在縣西唐池水在縣西南並注滹水

廣利渠在縣西南金太和六年縣令劉弁開渠風山下引唐河水灌田數千畝並灌鄰縣後廢明萬歷二十七年知縣楊一桂復濬溉田無算

縣故城在今縣東北

中人城左人城並在縣西北左傳昭公十三年晉荀虞以上軍侵鮮虞及中人鴻城在縣西北七十里大茂城在縣西北一百里夏屋城賈復城在縣北高昌城在縣東北伏城在縣西南雩水城在縣西三十里王陵城在縣西三十五里灌嬰城在縣西

四十里

倒馬關在縣西北一百五十里又八渡關亦在縣西北一名馬溺關王隱云望都縣有馬溺關中山記八渡馬溺是山曲要害之地

博野縣 疲北至府九十里

有永安一鎮

漢置蠡吾縣屬涿郡後漢為侯國屬中山國晉屬高陽國後魏屬高陽郡北齊廢蠡吾縣入博野唐宋皆為博野縣地元至元三年省博野入蠡州三十一年復置博野縣屬保定路明洪武元年遷治故蠡吾縣界屬邢州六年改屬保定府

蠡吾故城在縣西南

望都縣

衝難東北至府九十里

有馬驛一永豐一鎮

戰國趙慶都邑漢置望都縣屬中山國後魏初屬中山郡孝昌

中屬北平郡北齊省入北平縣隋開皇六年復置望都縣大業初廢唐武德四年復置屬定州宋屬中山府金改曰慶都元屬正定路太宗十一年改屬保定路

本朝乾隆十一年仍曰望都

博水今名界河源出縣境東流逕清苑及安州界與方順河合班固云望都縣博水東至高陽入河又清水河在縣南陽城淀在縣東南

縣故城在今縣西北唐貞觀八年移今治

柳宿城在縣東南

容城縣

簡西南至府九十里

有陳家一堡

漢置縣屬涿郡後漢省入迺縣晉復置屬范陽國後罷後魏太和復置屬范陽郡北齊天保七年省入范陽縣唐武德五年

復置又于縣置北義州貞觀元年州廢縣屬易州聖歷二年改曰全忠神龍二年改曰迺縣天寶元年復曰容城五代晉天福初入契丹周顯德六年亦置容城縣割屬雄州尋廢宋建隆四年復置金初治合二縣爲一泰和八年割屬安州貞祐二年改屬安肅州元仍屬雄州明初省入雄縣洪武十四年復置屬保定府

縣故城在今縣西北

完縣 簡東至府七十里

戰國漢曲逆巨漢置曲逆縣屬中山國後漢章和二年改曰蒲陰後魏初屬中山郡孝昌中分置北平郡北齊郡廢省蒲陰置北平縣隋屬博陵郡唐屬定州萬歲通天二年改曰狗忠神龍元年復曰北平五代唐長興三年改曰燕平宋初復故慶歷二

年置北平軍金改曰永平屬中山府貞祐二年升爲完州元至元二年廢爲永平縣尋復爲完州屬保定路明洪武二年廢州爲完縣

伊祁山在縣西祁水發源于此蒲陽山在縣西北

涖水今名唐河自易州廣昌縣南倒馬關流入迺縣西北及唐縣西南界又東南過定州入望都縣南界又迺祁州南會沙滋二水又東北迺博野蠡高陽三縣至安州東入白洋淀蘇水在縣西南班固云曲逆有蘇水東入濡又蒲水在縣北班固云蒲陽山蒲水所出東入濡縣境五靈水流九水並注祁水

曲逆故城在縣東南北平郡故城在縣東北
陽城在縣東南堯城在縣西南八里甘城在縣西北三里朝陽城在縣西

安陽關在縣西北王隱云蒲陰縣有安陽關蓋安陽關都尉所

治

蠡縣 繁難北少西至府九十里 有新橋一鎮

漢置陸成縣屬中山國後漢省入蠡吾永初元年改置博陵縣并置郡漢末郡廢以縣屬安平國晉泰始元年改縣曰博陸并置高陽國治焉後魏景明元年改縣曰博野屬高陽郡隋屬河間郡唐武德四年屬滿州五年以縣置蠡州八年州廢九年復置貞觀元年又廢縣屬瀛州永泰中改屬深州元和十年復隸瀛州後又屬深州五代周顯德二年改屬定州宋雍熙四年以縣置甯邊軍景德元年改永定軍天聖七年又改永甯軍宣和七年軍廢尋復故屬河北西路金天會七年升為甯州博野郡天德三年改曰蠡州屬河北東路元屬正定路至元三年省博

野縣入州明洪武二年改屬保定府八年改州為縣

小陳河在縣西北十二里源出望都縣又東入高陽縣界與楊

村河合

博陵故城在縣南

侯世城在縣東北郭丹城在縣東北四十里

雄縣 衝繁難西南至府一百二十里 有馬驛一

戰國時燕易邑漢置易縣屬涿郡後漢屬河間國晉曰易城縣後魏復故改屬高陽郡高齊天保七年省入鄭縣唐武德五年改置歸義縣屬幽州尋置北義州于容城以縣屬焉貞觀元年省八年復置歸義縣屬幽州大歷四年改屬涿州五代晉初入契丹周顯德六年收復于縣置雄州宋太平興國中改縣曰歸信政和三年賜郡名曰易陽置廣德軍金仍曰雄州天會七年

置永定軍節度元初軍廢至元二十三年屬保定路明洪武初省縣入州七年改州爲縣

雄河在縣南易水分流遶縣城逕瓦濟門東下亦曰瓦濟河又縣境玉帶河清河今並埋

蓮花淀在縣西南十里方三十里新安高陽諸水滙于此又柴禾淀在縣東南十餘里五官淀在縣東南七十里

易縣故城唐歸義故城並在縣西北易京城在縣西北後漢末公孫瓚所築亞谷城在縣東二里

瓦橋關在縣南易水上唐大歷九年盧龍留後朱滔討田承嗣軍于瓦橋

祁州 簡北少東至府一百二十里 有五女一堡 漢置安國縣屬中山國晉屬博陵郡後魏真君七年併入深澤

景明二年復置屬博陵郡北齊廢隋開皇六年改置義豐縣唐

屬定州萬歲通天二年改曰立節神龍元年復曰義豐宋太平興國初改曰蒲陰縣景德元年移祁州來治亦曰蒲陰郡金仍

爲祁州元屬保定路明省蒲陰縣入州派水今名沙河在州西南自定州流入合滋水又滋河在州西

南三十里自定州深澤縣東北流入與派水合木刀溝在州南自無極縣流入今堙

安國故城在州南 東鹿縣 繁難北少東至府二百五十五里

漢置安定郡貫三縣皆屬鉅鹿郡後漢改郡縣曰鄴省安定貫縣入之晉屬趙國後魏曰鄴北齊改曰安國隋開皇六年改爲

安定十八年改曰鹿城屬信都軍唐武德四年屬廉州貞觀元

年改屬深州十七年州廢屬冀州先天二年又屬深州至德二
載改曰東鹿宋初改屬鎮州酒化九年還屬深州元至元三年
改屬祁州

本朝屬保定府

滹沱河在縣南四十里自正定府晉州流入又東入深州界按
滹沱舊由縣北界其後漸徙而南明正德十四年由晉州決入
縣境天啓二年再決因徙縣治以避之

本朝順治十二年康熙五年並由晉州寨子村決入遂分爲五
道皆逕縣南入冀深二州界雍正三年又東徙決周頭村直衝
束鹿城四年始相度得舊河一道由禾丘南至焦岡入滄河遂
自第四溝開濬深通導之南流于周頭築堰障其東下自是縣
境乃免衝潰之患又吾斯浚水在縣西南班固云綿蔓縣斯浚

水首受大白渠東至鄆入河今堙又衡漳水在縣南今又改流
不逕縣界

縣故城在縣北明天啓二年移今治鄆縣故城在縣東安定故
城在今縣西北貫縣故城在縣西南漢樂信廢縣隋晏城廢縣
並在縣西

安州 簡西少南至府六十里

戰國時燕葛邑漢爲涿郡高陽縣地隋爲河間縣地唐如意元
年析河間置武興縣屬瀛州長安四年屬易州尋復屬瀛州神
龍元年改名唐興縣景雲二年改屬鄭州五代晉改曰宜川尋
復故周顯德六年省入鄭縣宋太平興國七年改置唐興若瀆
化三年建爲順安軍至道三年徙軍治高陽縣金大定二十八
年升葛城爲縣徙安州來治泰和八年移州治渥城以葛城爲

屬縣元初州還治葛城至元二年省入高陽後復置安州仍治葛城隸保定路明洪武七年省葛城縣入州仍改州爲縣十四年復置安州

依城河在州北自清苑縣流入又東入新安界即古濡滄諸水下流也左傳昭公七年齊燕盟于濡上杜預云濡水出高陽縣東北即此按自宋興塘灤水道變遷滄水自蠡東入河間不復北行而依城河止上承濡水今俗猶稱州爲濡上是也

祭過城在州西北

高陽縣 簡西北至府六十里 有龍化一堡

戰國時燕高陽邑漢初置高陽縣屬涿郡後漢屬河間國晉屬高陽國後魏爲高陽郡治隋開皇初郡廢十六年于縣置滿州大業初州廢屬河間郡唐武德四年復置滿州貞觀元年又廢

仍屬瀛州宋至道元年自唐興若徙順安軍來治熙甯六年省爲鎮八年復爲縣仍爲順安軍治金天會七年升軍爲安州大定二十八年州徙葛城以高陽爲屬縣泰和八年改屬莫州尋復故元屬安州明洪武八年併入蠡縣十二年復置永樂後屬保定府

高河在縣東二十五里亦曰泔河滄水支流也今淤縣故城在今縣東有高陽關明洪武三年移今治

安都城在縣西南三十八里

新安縣 疲西少南至府八十二里

漢容城縣地曰渾渥城金泰和四年析置渥城縣八年移安州來治元至元二年州縣俱省改爲新安鎮入歸信縣四年割入容城九年復置新安縣屬保定路明洪武七年省入安州尋復

置屬安州

本朝屬保定府

白洋淀在縣南二十里周六十餘里南高陽西安州東任邱北
新安東北雄縣五州縣環之古九十九淀之一也今總名西淀
又大渥淀在縣西北雜淀在縣西五里

三臺城在縣西戾城在縣西十里

承德府 衝繁難

新編戶十萬九千八百零五
丁五十五萬八千三百九十六

古東胡地漢為匈奴左境武帝時為塞地尋入烏桓後漢入鮮
卑中部魏為鮮卑軻比能地晉初為段氏宇文氏地後入慕容
氏為前燕後燕屬幽州北魏為安州廣陽郡燕樂縣地後併入
庫莫奚北齊隋唐因之去庫莫字但名奚遼為中京道澤州灤

河縣及北安州地金為北京路興州興化縣宜興縣地元為上
都路興州宜興興安及大甯路惠州地明為采顏衛地

本朝初內屬雍正元年設熱河廳十一年置承德州直隸布政
使司乾隆七年仍為熱河廳四十三年升為府分巡口外熱河
道駐此

府境 東西距一千二百里

八到 南北距八百十里

東至	盛京錦縣界七百五十里
西至	獨石廳界四百五十里
南至	遵化州邊界一百五十里
北至	圍場界二百八十里
東南至	永平府臨榆縣界五百八十里
西南至	順天府古北口界一百九十里
東北至	錦州府廣甯縣界一千五百里
西北至	口北道屬多倫諾爾廳界五百六十里
自府治至	京師四百二十里由古北口

土貢

馬 駝 鹿 麀 麋 塵 青羊 飛鼠 虎 豹 牛
羊 貂 穀麥 黍 豆 夜亮木 金蓮花

管縣五州一

灤平 平泉州 豐甯 建昌 赤峯 朝陽

灤平縣 衝繁難東至府界四十里 巡檢二駐鞍匠屯及張

漢至北燕與府同北魏為廣陽縣地西境為禦夷鎮地後併入庫莫奚北齊迄唐因之遼為中京道北安州地西境為夷王府地金為興化宜興二縣元為興安宜興二縣明初為興州衛本朝初內屬設喀喇河屯廳乾隆四十三年改置縣以通判管知縣事

大黑山在縣東五十里

濡水今名灤河在縣南源出獨石口外流逕古興州入府境又東南流入遵化州界自發源至入口約行千四五百里沽水今名白河在縣西班固云漁陽縣沽水出塞外東南至泉州入海

行七百五十里又縣境興州河宜孫河熱河等並注灤河

白檀故城在縣西南要陽廢縣在白檀城西又漢要陽廢縣在縣西南故興州及遼興安廢縣在縣南宜興故城在縣西北七十五里

平泉州 衝繁難西至府二百四十里

漢至晉與府同北魏為陽武平剛二縣地北齊為冀陽郡地隋為遼西郡地唐為奚地遼為大定府及恩州澤州地元為大甯路及惠州地明初為大甯新城富峪惠州諸衛

本朝初內屬雍正七年設八溝廳乾隆四十三年置州以同知管知州事

高石水今名豹河在州東北西南流入遷安縣界

元大甯故城在州東北一百八十里惠州故城在州南二十里

會州故城寬河故城在州南富峪故城在州北富庶故城在州東北

豐甯縣繁難東至府界二百五十里

巡檢四駐郭家屯黃姑屯大關兒土城子

漢至北燕與府同北魏為燕樂方城二縣地西南境為禦夷鎮地北境為庫莫奚地後併入庫莫奚北齊迄唐因之遼為北安州利民縣西境奚王府地金為興化宜興縣地西北境為桓州地元為宜興興安縣地西北境為開平縣地明初為開平衛地本朝初內屬乾隆元年設四旗廳四十三年改置縣以同知管知縣事

北魏安州故城在縣境內

建昌縣繁難西北至府界三百八十里

漢至北燕與平泉州同北魏為石城柳城二縣地北境為契丹

地隋為遼西郡地北境為契丹地唐為柳城縣地後與契丹雜居北境契丹西境奚地遼為阜俗龍山等縣地元為和衆龍山等縣明初為營州衛地

本朝初內屬乾隆二年設塔子溝廳四十三年改置縣以通判管知縣事

白狼山在縣境今名布祜圖山班固云白狼縣有白狼山故以名縣

遼惠和故城在縣北龍山故城在縣南和衆故城在縣西北

白狼城在縣南

赤峯縣繁難西南至府界三百里

漢至北燕與平泉州同北魏為庫莫奚地隋唐為契丹國地遼為三韓松山長樂安民等縣元為高州松州及全甯縣兼曾王

分地明初爲全甯衛地

本朝初內屬雍正七年設八溝廳乾隆三十九年析置馬蘭哈達廳四十三年改置縣以同知管知縣事

饒樂水今名英金河在縣北後漢書鮮卑傳季春月大會于饒樂水上

遼松山故城在縣境

朝陽縣繁疲難西南至府界五百里 巡檢一駐鄂爾土板

漢至北燕與平泉州同北魏爲龍城廣興定荒三縣地北境爲契丹地唐爲柳城縣後與契丹雜居遼爲興中營巨象雷間山諸縣元爲興中州等地東境兼爲義州懿州地西北兼得曾王分地明初爲營州衛地

本朝初內屬乾隆三年設塔子溝廳三十九年析置三座塔廳

四十三年改置縣以通判管知縣事

華山在縣東北龍山今名鳳凰山在縣境

白狼水今名大凌河在縣南參柳水今名小凌河在縣東南

遼安德故城在縣東南柏山上白川州故城在縣東北六十七里宜民故城在縣北建州故城在縣西

漢兒城在縣境

永平府衝繁難

原額人丁十二萬三千八百七十
又滋生人丁三千五百二十三

禹貢冀州之域有虞分爲營州地商爲孤竹國周爲幽州地春秋爲山戎肥子二國地戰國屬燕秦爲遼西右北平二郡地後魏太武徙置平州及遼西郡又分置北平郡後齊省遼西郡入北平郡隋開皇初郡廢大業初復曰北平郡唐武德二年復曰

平州天寶初仍曰北平郡乾元初復曰平州屬河北道後唐同光初入于遼置遼興軍節度屬南京道金天輔七年建為南京天會四年復曰平州置興平軍節度屬中都路元太祖十年改興平府中統元年升平灤路置總管府大德四年改曰永平路屬中書省明洪武初曰平灤府屬山東行省二年改屬北平行省四年又改曰永平府

本朝因之通判駐山海關

府境 東西距三百四十里 南北距二百二十里 東至錦州府甯遠州界一百八十里 西至遵化州界一百六十里 南至海岸一百六十里 北至桃林口邊界六十里 東南至海一百四十里 西南至順天府寶坻縣洋三百五十里 東北至邊界一百九十里 西北至遵化州邊界二百二十里

自府治至 京師五百五十里

土貢

鹽 金 丹錫 鐵 紙 鷹鷂 石灰 蔓荊子 香白芷 梨 鯽

管縣六州一

盧龍 遷安 撫甯 昌黎 灤州 樂亭 臨渝 盧龍縣 衝繁郭下 有馬驛一雙望一堡

本商孤竹國春秋為肥子國漢置肥如縣屬遼西郡後魏延和初為遼西郡及平州治又僑置新昌縣為北平郡治北齊廢遼西郡入北平隋開皇六年省肥如縣入新昌十八年改新昌曰盧龍大業初復為北平郡治隋末移郡治臨渝復改盧龍曰肥如唐武德二年仍改曰盧龍移平州來治宋宣和四年改曰盧城金復故元為永平路治

陽山在縣東南二十五里許慎說文首陽山在遼西孤竹山在

縣西十五里山椒產金沙山半產銀礦下產鐵冶孤竹國城在其陰又西十里有泥溝山聖水源出焉

渤海在府南一百六十里東連遼海西抵天津南通山東登萊浩瀚千有餘里自直沽之北折而東去豐潤灤州之南各一百二十里樂亭縣南四十五里又迤麗東北遶昌黎撫甯二縣東南歷山海關接甯遠州界其在昌黎縣南者又名溟海去縣三十餘里海至此突然北出七里而羸亦曰七里海

元水今名白溝河在縣東北源出陽山之陰遶城東北西流入青龍河班固云肥如縣元水東入濡水又黑厓子河温河並在縣北

肥如故城在縣北漢朝鮮故城在縣東遼望都廢縣在縣南孤竹城在縣南遼興城在縣東長城在縣北

遷安縣

繁疲難東南至府四十里

有馬驛一新店一堡大平一寨巡檢三駐二重營建昌營及喜峯口

春秋山戎令支國漢置合支縣屬遼西郡晉初沒于鮮卑為遼西郡治後魏真君八年省入陽樂後為肥如縣地五代時入契丹改置安喜縣屬平州金大定七年改曰遷安元至元二年省入盧龍後復置屬永平路

黃山在縣西後魏太安三年將東巡詔定行宮于遼西黃山又藍山在縣西南酈道元云素河所出六寶山在縣西北一百二十里舊有銀礦蟒山在縣東北舊產鐵

濡水今名灤河自遵化州流入縣西又東南逕盧龍灤州樂亭又南入海班固云肥如縣濡水南入海陽又寬河鐵門關河澈河恒河長河清河皆在縣西北並注灤河

盧水今名青龍河自桃林口流入縣東北又南逕盧龍縣西門外爲漆河南合灤河班固云肥如縣有盧水南入元水又縣境白洋河等並注盧水

令支故城在縣西遼灤陽故城在縣西

龍紀城在縣北二十里楊買驢城在縣北四十里

喜峯口關在縣西北百七十里

撫甯縣 衝難西至府七十五里

有榆關驛深河八里二堡
巡檢駐榆關

漢置陽樂縣屬遼西郡後漢爲郡治後魏仍屬遼西郡北齊省隋爲盧龍縣地唐武德二年分置撫甯縣七年仍省入盧龍金大定二十九年復置屬平州元至元二年省入昌黎縣三年復置四年又省七年復置屬永平路

兔耳山在縣西七里宋宣和五年張覺據平州歸宋敗金將閣

母于兔耳山又雙頂山在縣西南四十里舊產銀礦

渝水亦名渝河在縣東班固云臨渝縣渝水首受白狼東出塞

外南入海又有侯水北入渝縣境陽河湯河石河並注海

陽樂故城在縣西遼遷民故城潤州故城在縣東

洋河城在縣東南十五里山西城在縣西南五十里

山海關在縣東一百里本古渝關地也隋書開皇三年城渝十

八年漢王諒伐高麗出臨渝關又一片石關黃土嶺關義院口

關並在縣東北

昌黎縣 繁難西北至府七十里 有裴家靜安二堡

漢置秦縣屬遼西郡後漢省入臨渝晉以後爲海陽縣地隋唐爲盧龍縣地後僑置營州柳城縣五代時入契丹曰營州鄰海軍改縣曰廣甯金皇統二年廢營州以縣屬平州大定二十九

年又改曰昌黎元至元七年省入撫甯十二年復置屬灤州尋屬永平路

碣石山在縣西南書禹貢夾石碣石入于河山海經碣石之山繩水出焉班固云驪成縣大碣石山在西南文穎曰在遼西蔡縣案縣今罷屬臨渝此石著海旁又仙人臺山在縣北十里俗以此為碣石山

潮河在縣東二十里源出仙臺頂後東南流合飲馬河入海一名馬家河縣境諸水皆會于此按班固云蔡縣有下官水南入海又有碣石水賓水皆南入官圖經官水疑即潮河碣石水即縣西急流河賓水即縣南飲馬河也

蔡縣故城在縣南
鳳皇城在縣西道者山右柳城廢軍在縣西南

灤州 繁疲難東北至府四十里

有榛子一鎮管河州判駐胡家莊巡檢駐榛子鎮

漢置海陽縣屬遼西郡北齊省入肥如隋唐為盧龍縣地五代時契丹始析置灤州永安軍屬平州世宗又置義豐縣為州治金仍曰灤州屬中都路元屬永平路明初以州治義豐縣省入清水在州南南流注海圖經秦漢以來漕運故道明洪武中復濬以通海運又素水今名沂河與沙河官渠河王家河並在州西靳家河在州西南並注海按班固云海陽縣龍鮮水東入封大水封大水緩虛水皆南入海圖經龍鮮水疑即今州西陡河封大水疑即官渠河緩虛水疑即沙河也

海陽故城及漢昌城故城夕陽故城在州西南新安平故城在州西馬城故城在州南
茂鄉鎮城在州西七里獨莫城在州南九十里

千金冶在州南班固云夕陽有鐵官

濟民鹽場在州西南又樂亭有石碑場撫甯有歸化場

樂亭縣 簡北至府一百二十里 有馬驛一

漢置驪成縣屬右北平郡後漢省唐為石城縣地金大定末置樂亭縣屬灤州元初常于縣置溟州尋廢仍屬灤州

本朝屬永平府

驪城故縣在縣境按班固云驪成縣有大碣石山在西南輿地廣記碣石在今石城縣故驪城也石城縣在今灤州則驪成當在今樂亭樂亭縣圖有古城在縣西南三十里疑卽是也

臨渝縣 衝繁難西至府二百里 有石門寨巡檢駐

漢置臨渝縣在今錦州西界口外唐初于今灤州西北界改置臨渝縣為平州治武德二年移州治盧龍七年省貞觀十五年

復置萬歲通天二年改名石城遼又徙置以就鹽官宋宣和四年嘗賜名臨閭尋入金復曰石城元初省入樂亭

本朝至雍正三年復分樂亭撫甯置臨渝縣

石門路在縣西南距山海關四十里亦曰石門寨有城

河間府 衝繁難

原額人丁二十三萬四千三百六十二
又滋生人丁四千六百二十九

禹貢冀州之域春秋為燕齊及晉東陽地戰國為燕趙二國之境秦為鉅鹿上谷二郡地漢初為鉅鹿涿二郡地文帝二年始分置河間國治樂城屬冀州後漢初并入信都國和帝永元三年復置後魏初為河間郡屬定州太和十一年始分定冀二州置瀛州隋開皇初廢郡存州大業初復改州為河間郡唐武德四年復曰瀛州天寶元年復曰河間郡乾元元年復曰瀛州屬

河北道五代晉天福元年割屬契丹周顯德元年收復宋仍曰瀛州河間郡大觀二年升為河間府置瀛海軍節度屬河北東路金天會七年為河北東路治置總管府正隆間復置瀛海軍節度元至元二年置河間路總管府屬中書省明洪武元年曰河間府

本朝因之治河通判駐湖泊頭

府境

東西距一百六十里
南北距三百四十五里

八到

東至天津府青縣界一百里
西至保定府蠡縣界六十里
南至山東德州界一百二十五里
北至保定府雄縣界一百二十里
東南至天津府南皮縣治一百四十里
西南至冀州治二百三十里
東北至順天府文安縣治一百三十里
西北至保定府安州治一百四十里
自府治至京師四百十里

土貢

絹 綿
文官果

蓮

布 葦
芹菜

菘菜

魚

香梨
蝦蛤

蘋婆果

管縣十州一

河間 獻 阜城 肅甯 任邱 交河 甯津 景州

吳橋 東光 故城

河間縣

衝繁難郭下

有馬驛一景河一鎮巡檢駐北魏村

漢置州鄉武垣二縣俱屬涿郡後漢省州鄉以武垣屬河間國後魏太和十一年移河間郡治武垣又置瀛州于縣之趙都軍城隋大業初置河間縣為河間郡治省武垣入焉唐為瀛州治宋為河間府治

長豐渠有二在縣西北唐貞觀二十一年刺史朱潭開又西南五里有長豐渠開元二十五年刺史盧暉自束城平舒引滹沱東入淇通漕溉田五百餘頃

武垣故城在縣西南州鄉故城隋束城故城在縣東北

乞活城在縣北六里小陵城在縣西北

獻縣 衝繁疲難北至府六十里 有馬驛一淮鎮一鎮

本漢樂成縣為河間國治晉曰樂成後魏太和十一年移郡治武垣以縣屬之隋開皇十八年改曰廣城仁壽元年又改曰樂壽大業末竇建德都此唐武德四年建德平還屬瀛州後又改屬深州宋至道三年還屬瀛州金天會七年升為壽州天德三年改曰獻州元至元二年廢州仍為樂壽縣未幾復為州屬河間路明初省縣入州洪武七年又降州為獻縣

滹沱河上流即胡盧河自冀州合漳金二水由武強縣東北入縣境至縣西南完固口分為二一東流逕縣南十二里又逕交河縣會老漳河至青縣合衛河一自縣西分流曰鹽河東北逕

河間縣東五十里又東北入順天府大城縣界為子牙河按滹沱河古今遷徙不一漢志成平縣滹沱河民曰徒駭河樂成縣滹沱別水首受滹沱河東至東光入滹沱弓高縣滹沱別河首受滹沱河東至平舒入海在今獻縣交河阜城之地故瀆久堙蓋難悉考

樂成故城在縣東南隋樂壽故城在縣西南漢河陵故城在縣西北中水故城在縣境

阜城縣 衝北至府一百四十里 有馬驛一漫河一鎮

漢置縣屬勃海郡後漢徙廢晉復置後魏分屬武邑郡隋開皇九年屬觀州大業二年屬信都郡唐武德四年屬觀州貞觀十七年還屬冀州天祐二年改曰漢阜五代漢復故宋清化元年屬永靜軍嘉祐八年省為鎮入東光熙甯十年復置金屬景州

明洪武七年屬河間府

縣故城在今縣東漢弓高故城在縣西南蒲領故城在縣東北宅陽城在縣東簡子城在縣東南三十里

肅甯縣 簡東至府四十里 有豐樂一鎮

本漢武垣縣地隋唐為河間縣地宋雍熙初置平虜寨景德二年改為肅甯城金升為縣屬河間府元至元二年廢為鎮入河間縣尋復置

玉帶河在縣東即唐水下流舊自蠡縣流入與河間縣接界又東北入任邱縣為鏡河圖經保定滋沙滄三水舊自蠡縣引流而東歷肅甯之五千淀而達于雄縣之瓦濟河中堡玉帶二河皆其經流處也後自蠡縣北入高陽歷新安雄縣而出任邱之趙北口于故道多湮而玉帶河之名亦移于順天府之保定縣

縣故城在今縣治東南

任邱縣 衝繁難南至府七十里 有馬驛一郭市一鎮

本戰國燕鄭邑漢置鄭阿陵高郭三縣俱屬涿郡後漢省阿陵高郭二縣以鄭縣屬河間國後魏及隋屬河間郡唐武德四年改屬滿州五年始分置任邱縣屬瀛州景雲二年于鄭縣置鄭州併領任邱開元十三年改鄭為莫天寶初改州為文安郡乾元元年復曰莫州五代晉天福元年地入契丹周顯德六年收復宋熙甯六年省莫縣入任邱移州治之金貞祐二年州縣俱廢改置莫亭縣元初復于莫亭置莫州并置任邱縣屬之至元二年州縣俱省入河間後復置屬河間路明洪武七年省莫州入任邱

易水故道在縣西北三十里自新安縣流入與雄縣分界又東

入文安縣界又涖水故道在縣及河間二縣界

通利渠在縣南唐會要武德中鑿開元四年縣令魚思賢復開濬以洩陂淀自縣南五里至縣西北注于涖水得地二百餘頃土人名魚君陂

掘鯉淀在縣北又狐狸淀在縣西北五官淀在縣東北三十五里

趙北口在縣北五十里白洋諸淀之水皆由此東流

縣故城在今縣南鄭縣故城在縣北漢高郭故城在縣西十七里阿陵故城唐長豐故城在縣東北

交河縣繁疲難西北至府一百十里

有馬驛一泊頭高川二鎮巡檢一駐新橋

漢置建成平景成三縣皆屬勃海郡後漢省建成景成以成平屬河間國後魏延昌二年徙縣治故景城屬章武郡隋開皇

十八年改成平日景城屬河間郡唐武德四年屬瀛州貞觀元年屬滄州大歷七年還屬瀛州長慶二年分屬景州大中後又屬瀛州宋熙甯六年省景城入樂壽縣金大定七年始分樂壽置交河縣屬獻州元至元二年又省入樂壽尋復置明洪武七年改屬河間府

清河在縣西二十五里漳水支流也北流至縣東北散入于滹沱河一名鹽河又名運糧河又倒流河在縣東北九十里亦合滹沱

成平故城建成故城在縣東景成故城在縣東北甯津縣簡西北至府二百三十一里有保安一鎮

本漢東光臨樂二縣地屬勃海郡後漢省臨樂晉置新樂縣屬樂陵國後魏省隋開皇十六年置胡蘇縣屬平原郡唐武德四

年屬觀州六年屬滄州仍移州來治貞觀元年州還治清池仍以縣屬觀州十七年又屬滄州天寶元年改名臨津貞元三年屬景州長慶元年還屬滄州二年又屬景州太和四年又屬滄州景福元年仍屬景州五代周顯德二年還屬滄州宋熙甯六年省入南皮縣金改置甯津縣屬景州元初屬濟南路至元二年改屬河間路

上河在縣南二十五里自山東陵縣流入又東入山東樂陵縣界相傳卽篤馬河又土人云高津河在縣西宋時大河所經圖經黃河逕樂陵臨津鹽山入海卽此

屯氏北瀆在縣南

縣故城在今縣西金天會六年移今治又臨樂故城在縣北永州城在縣東四十里

景州

衝繁西北至府一百九十里

有馬驛一安陵宋門廣川李宴四鎮巡檢駐龍華

漢置修縣屬信都國後漢改屬勃海郡隋開皇五年改修曰蓀唐武德四年于弓高縣置觀州以縣屬之貞觀十七年州廢改屬德州永泰元年還屬冀州金始以蓀縣屬景州元初升爲元州後復爲蓀縣至元二年自東光移景州來治屬河間路明初省蓀縣入州

古黃河由今山東德州流入州境及吳橋東光與衛河合又北至滄州入海按此爲西漢以前故道東漢後河自千乘入海而故道遂爲漳衛所占至宋時復由此熙甯二年河東徙北流始閉南渡後益徙而南北流遂絕又鳴犢河故瀆在州西南修縣故城在州南漢修市故城在州西北龍額故城在州東三

十里

吳橋縣

繁難西北至府二百四十里

有連窩一鎮

漢置安縣屬平原郡後漢省晉置東安陵縣屬勃海郡後魏去東字隋大業初併入東光唐武德四年復置安陵縣屬觀州貞觀十七年屬德州宋景祐二年省入將陵縣金始分將陵之吳橋鎮置吳橋縣屬景州

本朝與東光故城並改屬河間府

安陵故城在縣西北漢重平故城在縣南

東光縣

繁難西北至府一百六十里

有馬頭一鎮

漢置縣屬勃海郡東魏移勃海郡于此隋開皇初郡廢九年于縣置觀州大業初州廢以縣屬平原郡唐武德四年于弓高置觀州以縣屬之貞觀十七年州廢縣屬滄州貞元二年又于弓

高置景州以縣屬之長慶元年州廢還屬滄州二年又屬景州太和四年又還滄州景福元年又屬景州天祐五年移州來治五代周顯德二年廢景州為定遠軍屬滄州宋太平興國六年以軍直隸京師景德元年改曰永靜軍金初仍升為景州大安間避諱改曰觀州元初復故至元二年始移州治蓀縣以東光為屬縣

本朝雍正七年改屬滄州九年仍屬河間府

胡蘇河在縣東南爾雅九河之一漢書成帝時許商以為胡蘇河見在東光界中按府之南界滄溟德棣之間本古九河所經之地今考諸書惟胡蘇河為有據外此則甯津之鬲津河尙與古合至如漢志以滹沱為徒駭金志亦為樂壽縣有徒駭河徒駭河之本道非滹沱也又獻縣圖經載鬲津枯河在縣西二里

馬頰河在縣東六十里鉤盤河在縣東南六十里乃後人鑿以導水附會九河舊名耳又靳河在縣南二十里

縣故城在今縣東隋開皇三年移今治又漢弓高廢縣侯井廢縣並在縣西

西光城在縣西三里廢壘城在縣東二十五里

故城縣

簡北至府二百八十里

有鄭家口一鎮巡檢駐

漢置廣川歷二縣皆屬信都國後漢省歷縣爲廣川縣地北齊爲棗強縣地隋爲長河縣地唐元和四年移長河縣治此十年又徙廢元初以唐故長河縣置故城縣屬河間路至元二年併爲故城鎮是年復置屬景州

漳水俗名老漳河自山東邱縣分流至廣平府清河縣北流入縣境逕縣西又北逕景州阜城交河入天津府滄州西界合滹

沱河班固云清漳水東北至阜城入大河

衛河亦名清河卽運河自山東武城縣流入逕縣南關外復自山東德州界北流逕吳橋景州東光交河與南皮縣分界又東北入滄州界亦曰永濟渠又名御河又枯河在縣西南五十里張甲河故瀆在縣及景州界

歷縣故城在縣北

金堤在縣西南自大名縣界逶迤而東北入縣境卽後漢王景所築橫亘千里

曾孫用勳校刊

乾隆府廳州縣圖志卷三

賜進士及第翰林院編修充 國史館纂修官 臣 洪亮吉撰

天津府 衝繁疲難

原額人丁三萬二千四百三十五
又滋生人丁八百六十六

禹貢冀兗二州之域周為幽兗二州之域戰國為燕齊二國之境秦為漁陽上谷二郡地漢為漁陽勃海二郡地晉為燕國章武國及勃海郡地後魏為浮陽章武勃海三郡地分屬滄瀛冀三州隋屬河間渤海二郡地唐為瀛滄二州地宋金為清滄二州地明永樂初置天津左右三衛為河間府地

本朝初設關置總兵鎮守雍正三年改天津衛為州直隸布政使司九年又升為天津府督理長蘆鹽院及都轉鹽運使分巡天津等處兼管河務道並駐此管河通判駐三角淀河捕通判

駐滄州

府境

八到

東至海一百三十里	西至順天府界八十里	南至順天府武清縣界三十里	北至順天府武清縣界三十里	東南至海豐縣界三十里	西南至河間府交河縣界二十里	東北至順天府寶坻縣界一百六十里	西北至武清縣界一百二十里	自府治至京師二百五十里
----------	-----------	--------------	--------------	------------	---------------	-----------------	--------------	-------------

土貢

酒 綿 絲 綾 布 簞 柳箱 鱗 魚 鹽

管縣六州一

天津 靜海 青 滄州 南皮 鹽山 慶雲

天津縣

衝繁疲難郭下 有楊青一驛巡檢二駐葛沽西沽

本漢勃海郡章武縣及漁陽郡泉州縣地唐以後為滄州地元

為靜海縣地置海濱鎮明永樂二年築城置成三年調天津衛及天津左衛治焉四年又調天津右衛于此

本朝雍正三年改衛為州九年升府以州境置天津縣為府治渤海在縣東百二十里南自鹽山東北接山東海豐界又北逕滄州青縣靜海至府東諸川匯入處折東北接順天府寶坻甯河二縣界古曰勃海應劭曰海之旁出者為勃漢置勃海郡以此元時海運皆由天津東直沽入口明永樂中會通河成始罷潞河在縣北亦名白河即北運河也自順天府武清縣流入至縣北與衛河合

大河故道在府南自河間府東光縣流入逕南皮滄州青縣靜海而達于天津此西漢時大河入海之道亦即宋時河合永濟渠北流之道也班固云河水至章武入海

直沽在府城北南則衛河合南路之水北則白河受北路之水西則丁字沽受三角淀之水皆至城東北三盼俗作岔口合流東注舊名小直沽其東南十里曰大直沽又東南百餘里為大沽口衆水由此入海卽通典所云三會海口也又西沽在縣北鹹水沽在縣東南六十里卽豆子航也隋大業十二年厭次人格謙爲盜在豆子航中王世充破斬之

漂榆城在縣北

鹹場在府境者十一天津有富國場豐財場靜海有興國場滄州有嚴鎮場利民場鹽山有阜民利國海豐富民海盈阜財等六場

靜海縣 衝繁疲難東北至府七十五里

有子牙獨流二鎮 巡檢駐獨流

本漢章武東平舒二縣地宋爲清州窩口砦金明昌四年以其

地置靖海縣仍屬清州元至元二年併入會川縣尋復置明洪武初改靖曰靜七年改屬河間府

本朝雍正三年改屬天津州尋屬府

子牙河在縣西一名鹽河卽滹沱河下流自河間府獻縣分流逕河間縣東流入縣境與大城縣分界復北流入武清縣三角淀又古界河在縣西北亦曰潮河古爲滹沱易水巨馬三水匯流處自文安縣流入合御河至獨流口入海宋遼以此河爲界故名

青縣 衝繁疲難東北至府一百六十里

有興濟長蘆杜林 磚河范橋流河六 鎮巡檢三駐興濟 杜林流河

漢置參戶縣屬勃海郡後漢省入章武縣隋爲長蘆魯城二縣地唐乾甯中置乾甯軍五代晉天福初地入契丹置甯州周顯

德六年收復仍曰乾甯軍并置永安縣爲治宋初軍廢屬滄州
太平興國七年復置乾甯軍并改永安縣曰乾甯熙甯六年省
縣爲鎮元符二年復置縣崇甯三年又省縣大觀二年升乾甯
軍爲清州政和三年賜名乾甯郡五年復置乾甯縣金仍曰清
州貞元元年改縣曰會川元太宗二年改州曰清甯府七年復
曰清州屬河間路明初省會川縣入州洪武七年廢清州爲青
縣屬河間府

本朝雍正三年改屬

滹沱河自河間府獻縣分逕交河縣流至縣南七十里杜林鎮
與漳河會又漳河亦自河間府交河縣流入又北至縣南二里
合于衛河其合處曰汧河口

參戶故城在縣南又金興濟故縣在縣東南三十里

蒲領城在縣境

滄州 衝繁疲難北少東至府一百八十里

有郭橋合口同
居三鎮巡檢三
駐威化孟村李

秦上谷郡地漢高帝五年置渤海郡治浮陽縣屬冀州後漢移
郡治南皮以浮陽爲屬縣後魏太和十一年于浮陽縣置浮陽
郡熙平二年又分置滄州治饒安縣隋開皇初郡廢于後周所
置長蘆縣置漳河郡郡尋廢十六年又分置景州十八年改浮
陽縣曰清池大業初二州皆廢爲勃海河間二郡地唐武德元
年復置滄州治清池天寶元年改景城郡乾元元年復曰滄州
興元三年置橫海軍節度使五代梁乾化三年改曰順化軍後
唐復曰橫海軍宋亦曰滄州景城郡橫化軍節度金仍曰滄州
元屬河間路明洪武初以州治清池縣省入

本朝雍正七年升為直隸州又分河間府之南皮鹽山慶雲東光四縣屬之九年並改屬天津府

九河故道在州及南皮諸縣境按九河之說諸家不一漢書成帝時許商言古說九河之名有徒駭胡蘇鬲津三河今見在成平東光鬲界中漢時近古止得其三唐人遂得其六歐陽忞輿地廣記又得其一故昔人以爲皆似是而非孔穎達尚書疏據許商言謂爾疋九河之次從北而南既知三河之處則其餘六者馬頰太史覆釜在東光之北成平之南簡絜鉤盤在東光之南鬲縣之北其河填塞時有故道今河間弓高以東至平原鬲津往往有其遺處蓋九河故道斷在今直隸滄景以南山東武德以北但堙塞已久不當按名以索耳

屯氏河在州南自南皮流入又東入鹽山縣界班固云屯氏河

東北至章武入海又浮河在州東南亦東入鹽山界

平魯渠在州北

州故城及漢饒安故城定縣故城章鄉廢縣並在今州東隋浮水故城在州東唐乾符故城在州東北漢中邑廢縣在州界五壘城在州南燕留城在州東北麻姑城在州北

南皮縣

繁疲難東北至府二百五十里

有馬明底橋刀公樓三鎮

秦置縣漢屬勃海郡後漢移郡來治後魏世祖改郡曰滄水太和二十一年復故東魏移郡治東光以南皮屬之隋屬勃海郡唐武德四年屬觀州貞觀元年屬滄州長慶二年改屬景州太和四年又還滄州景福元年又屬景州五代周顯德二年又還滄州

衛河亦名清河自河間府東光交河二縣流入縣西二十里又

北逕滄州青縣合滹沱河又北逕靜海縣至天津縣北與白河會曰三峯河東流注海又無棣河自縣境流逕滄州南又東逕鹽山慶雲二縣入山東海豐縣界

縣故城在今縣東北東魏移今治漢高樂故城在縣東南北皮城在縣東北

鹽山縣 繁疲難北至府二百六十里

有海豐崔家口高家灣望樹常郭韓村萊園蘇基楊莊九鎮巡檢二駐舊縣楊莊

春秋齊無棣邑漢置高成縣屬勃海郡為都尉治後漢曰高城侯國後魏太和中屬浮陽郡與和中分立東西河郡及隰城縣武定末罷仍屬浮陽郡隋開皇十八年改曰鹽山屬勃海郡唐武德四年置東鹽州貞觀元年州廢改屬滄州

篋山在縣東又李吉甫云縣東南八十里有鹽山樂史云縣東

南九十里有潤山今按縣東南境止三十五里無此二山即境外亦無之未知吉甫等何據樂史稱郡國縣道記二山並低小或漸平耳

劉公渠在縣西南五十里縣境舊承無棣溝下流大小羣川悉附入海無棣溝塞每患泛溢明萬厯中知縣劉子誠自縣西南開渠至縣東南四十里合古黃河入海今堙

高城故城在縣東南漢柳縣故城在縣東平津故邑在縣南慶雲縣 疲北少西至府三百二十里 有無棣分水二鎮

春秋齊北境漢勃海郡陽信縣地隋開皇六年分置無棣縣仍屬勃海郡唐初屬滄州貞觀元年併入陽信八年復置太和二年改屬棣州尋屬滄州宋治平元年徙治東界元初分無棣之半置西無棣縣仍屬滄州至元二年併入樂陵尋復置明永樂

初避諱改曰慶雲

陷河在縣南今名獻河東入海按齊乘以此為即鉤盤河圖經又以為即篤馬河之別名又謂即禹貢簡皆無所據又明月沽在縣東北七十里胡蘇兩津諸水滙聚于此為瀕海煮鹽之所無棣故城在縣東

荻苴城在縣東

正定府 衝繁

原額人丁四十三萬五千九百九十五
又滋生人丁二千三百九十二

禹貢冀州之域春秋屬晉戰國屬趙秦為鉅鹿郡地漢高祖置恒山郡後改曰常山郡元鼎四年分置正定國俱屬冀州後漢建武十三年省正定入常山國晉仍為常山郡屬冀州後周宣政元年于郡置恒州隋開皇初廢郡存州大業初復改州為恒

山郡唐武德初復為恒州天寶元年復曰常山郡乾元元年仍曰恒州屬河北道寶應元年置成德軍節度使興元元年升都督府元和十五年改曰鎮州五代後唐初建北都尋罷改州為正定府晉天福七年復曰恒州漢仍曰鎮州尋復為正定府周又為鎮州宋復曰正定府常山郡成德軍節度為河北西路治元曰正定路置總管府屬中書省明曰正定府

府境
東西距四百六十五里
南北距三百七十里

八到
東至河間府景州界二百七十五里
西至山西孟縣界一百九十里
南至順德府唐山縣界二百七十里
北至保定府唐縣界一百七十里
東南至山東武城縣治三百四十里
西南至山西樂平縣治二百五十里
東北至保定府祁州治二百五十里
西北至山西五臺縣治四百五十里
自府治至京師六百一十里

土貢

羅

梨

木耳

菜

苜蓿

管縣十三州一

正定

井陘

獲鹿

元氏

靈壽

樂城

平山

阜平

行唐

贊皇

晉州

無極

藁城

新樂

正定縣

衝繁難郭下

有恒山伏城二驛

本戰國時中山國東垣邑漢初置東垣縣高帝十一年更名正定屬常山郡武帝元鼎四年置正定國治此後漢屬常山國晉為常山郡治後魏屬常山郡北齊復為郡治後周兼為恒州治隋為恒山郡治唐初復為恒州治載初元年改曰中山神龍元年復曰正定長慶後為鎮州治宋為正定府治西韓河在縣西二十里東南流入滹沱河東垣故城在縣西南

故權城在縣北二十里即古之犍鄉也

曰馬關在縣西北金大定十七年滹沱河決白馬岡關始廢

井陘縣

衝東北至府一百三十里

漢置縣屬常山郡北齊改置縣于石邑廢故縣入之隋開皇六年復置十六年于縣置井州大業初州廢仍屬恒山郡義甯元年又于縣置井陘郡唐武德元年復曰井州貞觀十七年州廢仍屬恒州宋屬正定府熙甯六年省入獲鹿平山八年復置金天會七年于縣置威州亦曰陘山郡元憲宗二年徙州治洛水以縣屬焉明初還屬正定府

井陘山在縣東北與獲鹿縣接界班固云石邑縣井陘山在西李吉甫云四面高中央下如井故曰井陘

治河源出山西平定州東流入縣南合甘洵河又東北入平山

縣界舊自縣西入滹沱今改流自平山又東北逕獲鹿正定欒城達于汶水上流卽古綿蠻水下流卽古太白渠亦斯汶水之上源也班固云上艾縣綿蔓水東至蒲吾入滹沱水又綿蔓縣斯汶水首受太白渠東至鄆入河又甘洵河亦自平定州流入至縣東合綿蠻水圖經綿蠻水合甘洵河後始名洵河縣故城在今縣北宋天威故城在縣東北五十里隋葦澤廢縣在縣西南三十里

秀林城在縣東南十五里靈真城在縣西南二十五里

井陘關在縣東北井陘山上與獲鹿縣接界亦曰土門關卽呂氏春秋九塞之一也又固關在縣西南四十里接山西平定州界舊曰故關

獲鹿縣 衝東北至府六十里

本戰國中山國石邑後屬趙漢置石邑縣屬常山郡後漢省晉復置仍屬常山郡北齊廢井陘改石邑曰井陘隋開皇六年復曰石邑十六年析置鹿泉縣并屬井州大業初復省鹿泉入石邑屬恒山郡義甯初改置郡于石邑復置鹿泉縣屬焉唐武德四年徙恒州治正定以石邑爲屬縣而鹿泉縣屬井州貞觀十七年廢井州以鹿泉屬恒州至德初改鹿泉曰獲鹿宋開寶六年省石邑縣入焉屬正定府金興定三年升爲鎮甯州元初曰西甯州太宗七年復爲獲鹿縣按唐改鹿泉曰獲鹿李吉甫云貞觀二年新唐書又云天寶十五年皆誤今從舊唐書志封龍山在縣南接元氏縣界一名飛龍山史記趙武靈王二十一年攻中山取石邑封龍又抱犢山在縣西八里洹水源出縣南東流逕欒城縣西又南入趙州界班固云石邑

縣井陘山洩水所出東南至慶陶入泚又金水河源出封龍山東流至欒城合洩水歲久淤廢明萬曆中重濬又井陘水在縣東北今堙

大唐渠在縣東北

石邑故城在縣東南漢綿蔓故城在縣北樂陽故城在縣東北元氏縣簡東北至府九十里

戰國趙元氏邑漢置縣為常山郡治晉改屬趙國後魏屬趙郡北齊廢隋開皇六年復置屬趙郡唐屬趙州五代唐改屬正定府元初屬趙州太祖十五年還屬

無極山在縣西三十五里按縣以山名實無山形也

沙河在縣西北八里西山諸水所匯亦名猪龍河東流至趙州界合洩水又有朶沙河在縣西北三十里亦合洩水

縣故城在今縣西北隋以後移今治又隋靈山廢縣在縣西北靈山下

上元城在縣西

靈壽縣簡東南至府五十里 有慈峪一鎮

本戰國時中山國地漢置縣屬常山郡後周屬蒲吾郡隋開皇初郡廢屬恒州大業初屬恒山郡義甯初置燕州唐武德四年州廢以縣屬井州貞觀十七年還屬恒州宋熙甯六年省為鎮

入行唐八年復置屬正定府

衡水在縣東俗名雷溝河班固云靈壽縣禹貢衡水出東北東入滹沱又聖水在縣西北嵩陽河在縣西南五里並注滹沱河縣故城在今縣西北十里晉移今治

趙王城在縣西北十五里

藥城縣

衝北至府六十里

有馬驛一

春秋時晉欒邑戰國屬趙漢置關縣屬常山郡後漢改置欒城縣屬常山國晉省後魏太和十一年復置屬趙郡北齊又廢隋開皇十六年復置屬欒州大業初屬趙郡唐屬趙州大曆三年屬恒州天祐二年更名欒氏五代後唐復故宋屬正定府元初屬趙州太祖十五年還屬正定路

縣故城在今縣南關縣故城在縣北

平山縣

簡東少南至府七十里

有田舍郭蘇二鎮巡檢駐洪店

戰國趙番吾邑漢置蒲吾縣屬常山郡隋開皇十六年析置房山縣大業初省蒲吾入井陘以房山屬恒山郡義甯初于縣置房山郡唐武德元年改曰嶽州四年州廢屬井州後屬恒州至德元載改曰平山宋屬正定府

房山在縣西北一名鐵山班固云蒲吾縣有鐵山後漢書元和三年幸趙祠房山于靈壽

滹沱河自山西孟縣流入縣北又東逕靈壽正定藁城晉州入保定府界古今注後漢永平十年作常山滹沱河蒲吾渠通漕船隋圖經魏改滹沱曰清甯河又石曰河今名滅河在縣北舊人行唐縣界即木刀溝上源今上流為滋水所亂故道已堙下流淤塞亦不復東行矣後漢書永平中理滹沱石曰河從都盧至羊腸倉欲令通漕太原吏人苦役連年無成轉運所經三百八十九隘前後溺死者無算建初三年從鄧訓言罷其役蒲吾故城及漢桑中故城並在縣東南

封城在縣西二十里

阜平縣

簡東南至府二百十里

有王快一鎮

本漢靈壽及南行唐二縣地宋咸平三年析置北砦金初改曰北鎮明昌四年置阜平縣屬正定府

本朝順治十六年省入曲陽行唐二縣康熙二十二年復置大茂山在縣東北七十里接曲陽縣界即恒山之嶺石晉與契丹分界處

派水即沙河也自山西繁峙縣流入涇縣南又東南歷曲陽涇行唐及新樂縣東過定州界至祁州合滋河晉隆安元年魏主珪進軍新市慕容麟退阻派水又縣境平陽燕支北流等河皆注派河

故縣在今縣治西

行唐縣 簡南至府七十里

有兩嶺口巡檢駐

本戰國趙南行唐邑漢置南行唐縣屬常山郡為都尉治後魏

曰行唐縣太和十四年置唐郡二十一年郡廢仍屬常山郡隋屬恒山郡唐屬恒州長壽二年改曰章武神龍元年復故大曆三年于縣置泚州九年廢仍屬恒州五代梁開平二年又改曰章武後唐同光初復故晉改曰永昌漢復故宋屬正定府元初改屬保定路明還屬正定府

箕山在縣西北五十里其西為牛飲山班固云南行唐縣牛飲山白陘谷滋水所出東至新市入滹沱水

滋水源出山西五臺縣界東南流逕靈壽縣北及縣南又東逕正定藁城二縣北無極縣南又東北入定州深澤縣界亦名資水又縣境邵河賈莊河並注派河

南行唐故城在今縣北隋滋陽廢縣在縣西

夫人城在縣北

贊皇縣

簡東北至府一百二十里

本漢房子縣地北齊為高邑縣地隋開皇十六年析置贊皇縣屬欒州大業中屬趙郡唐屬趙州宋熙甯五年省為鎮入高邑元祐元年復置屬慶源府金屬沃州元至元二年并入高邑十年復置仍屬趙州

本朝屬正定府

贊皇山在縣西南穆天子傳癸丑至房子登贊皇山班固云房子縣贊皇山石濟水所出

沮水今名槐河源出縣西東北流逕元氏縣南又東流入趙州高邑縣界亦名泚水班固云元氏縣沮水首受中邱西山窮泉谷東至堂陽入河又泚水在縣南今名沙水亦東流入高邑縣界一名白溝水班固云石濟水東至廩陶入泚

回車城在縣南

晉州

簡西少北至府九十里

有東里一堡

春秋時鼓國後屬晉戰國屬趙漢置下曲陽縣屬鉅鹿郡為都尉治晉屬趙國後魏曰曲陽為鉅鹿郡治北齊省隋開皇中改置昔陽縣屬欒州十八年改曰鼓城大業初屬趙郡唐武德四年屬廉州貞觀元年屬定州大曆三年改屬恒州宋端拱初改屬祁州元太祖十年始于縣置晉州屬正定路明洪武初以州治鼓城縣省入

府

本朝雍正二年升直隸州領無極藁城二縣十二年復屬正定府
下曲陽故城在州西漢安鄉故城在州東臨平故城在州東南
隋廉平廢縣在州西南

無極縣

簡西少南至府七十里

有陳村一堡

漢置縣屬中山國晉省後魏太和十二年復置屬中山郡隋屬博陵郡唐武德四年屬廉州貞觀元年屬定州萬歲通天二年改毋字為無景福二年于縣置祁州宋景德元年移州治蒲陰以縣屬定州金屬中山府明洪武初屬正定府

縣故城在今縣西唐陘邑故城在縣東北

新城在縣西安鄉城在縣東南康城在縣北五里

藁城縣

簡西北至府六十里

有馬驛一

春秋為肥子國後并于晉漢置藁城縣屬正定國後漢省後魏太和十二年復置屬鉅鹿郡北齊改曰高城兼移鉅鹿郡治焉隋開皇初郡廢十年置廉州十八年復改曰藁城大業初州廢縣屬趙郡義甯元年復置鉅鹿郡唐武德元年復曰廉州貞觀

元年州廢縣屬恒州天祐二年改曰藁平五代後唐復故宋屬

正定府元太宗六年升為永安州七年州廢復為藁城縣

縣故城在今縣西南隋大業二年移今治漢九門故城在縣西北肥纍故城隋宜安故城並在縣西南新豐廢縣在縣東柏肆廢縣在縣北三十里唐信義廢縣在縣西北

新樂縣

衝波西南至府九十里

有馬驛一南蘇一堡

本春秋鮮虞國漢置新市縣屬中山國隋開皇十六年析置新樂縣大業初省新市入九門縣以新樂屬博陵郡唐屬定州宋屬中山府明屬定州

本朝屬正定府雍正二年分屬定州十二年還屬

木刀溝在縣西南舊自平山行唐縣流入又東逕無極縣北又東入保定府界今下流已堙餘水與沙河相通

縣故城在今縣西

順德府 衝

原額人丁十九萬七百八又滋生人丁二千二百三十四
屯丁一千八百六十六

禹貢冀州之域殷時為邢都周初為邢國春秋屬晉戰國屬趙
秦屬鉅鹿郡漢為趙廣平二國及鉅鹿常山二郡地後漢屬趙
國及鉅鹿郡晉為廣平郡及趙國地後魏為北廣平南趙二郡
周武帝置襄國郡隋開皇初郡廢十六年置邢州大業初復曰
襄國郡唐武德元年復曰邢州置總管府四年府罷天寶初改
曰鉅鹿郡乾元初復曰邢州屬河北道中和二年徙昭義軍節
度于此五代梁開平二年改曰保義軍後唐同光元年改安國
軍宋初仍曰邢州鉅鹿郡安國軍節度宣和中升信德府屬河
北西路金天會七年復降為邢州仍置安國軍節度元初置元

帥府後改安撫司中統三年升為順德府至元二年置順德路
總管府屬中書省明洪武初仍為順德府

府境

八到

東至廣平府威縣界一百二十里
南至山西和順縣界一百六十里
西至廣平府永年縣界六十里
北至趙州臨城縣界九十里
東南至永年縣界九十里
西南至河南武安縣界一百二十里
東北至冀州新河縣界一百二十里
西北至正定府贊皇縣界一百五十里
自府治至京師一千里

土貢

絲布 瓷器 刀 文石 解玉沙

管縣九

邢臺 沙河 南和 平鄉 鉅鹿 廣宗 唐山
內邱 任

邢臺縣

衝繁難郭下

有馬驛一黃榆黃寺二堡巡檢駐西黃村

秦置信都縣項羽改曰襄國漢屬趙國建安十七年割屬魏郡
晉屬廣平郡後併入任縣後魏太和二十年復置屬北廣平郡
建義初分屬易陽郡周武帝置襄國郡隋開皇初郡廢九年改
曰龍岡十六年為邢州治尋為襄國郡治唐為邢州治宋宣和
二年改曰邢臺

夷儀山在縣西王隱云樂平縣東南有夷儀嶺道通襄國又雷
公山在縣西北漢末雷公賊保此因名

百泉水今名澧河源出縣東南東流逕南和任縣入大陸澤亦
名鴛鴦水一名澆水又曰任水縣境蓼水今名達活河及七里
河野河等並注澧河

襄國故城在縣西南

夷儀城在縣西春秋僖公元年邢遷于夷儀白雞城在縣西十

三里

沙河縣

衝北至府三十五里

有棊陽一鎮

本漢襄國縣地隋開皇十六年析龍岡地置沙河縣屬邢州唐
武德初于縣置溫州四年州廢縣還屬邢州

磬口山在縣西南李吉甫云漢魏時舊鐵官也又黑山在縣西
出鐵湯山在縣西北山海經湯山湯水出焉

渴水今名沙河河源出山西遼州東流入縣南又東逕南和任縣
入滏陽河又狼溝河在縣東北十五里即百泉水分流至南和
縣與渴水合班固云襄國西山渴水所出東北至任入滏又有
蓼水馮澆水皆東至朝平入渴按漢志渴水今本誤作渠水諸
地志並從之今从舊本及水經改正西山當即今邢臺縣西二

十五里之封山土人至今亦謂之西山也

縣故城在今縣東五代梁開運元年移今治

南和縣繁疲西北至府四十里

漢置縣屬廣平國後漢屬鉅鹿郡建安十七年割屬魏郡晉屬

廣平郡高齊郡省後周又置南和郡隋開皇初郡廢屬襄國郡

唐武德初于縣置和州四年州廢仍屬邢州元至元二年併入

沙河後復置屬順德路

列葭水舊在縣南班固云南和縣列葭水東入澆

平鄉縣疲難西至府八十里 有常河一鎮

戰國趙鉅鹿邑秦置鉅鹿縣并置鉅鹿郡漢仍為郡治後漢移

郡治慶陶以鉅鹿為屬縣後魏景明二年改置平鄉縣孝昌中

屬南趙郡隋開皇三年屬洺州十六年屬邢州唐武德初于縣

置封州四年州廢仍屬邢州宋熙寧六年省入鉅鹿縣元祐初復置

滏水一名滏陽河自廣平府雞澤縣流入縣東七里又北逕任

縣東入趙州隆平縣界又洺河亦自雞澤縣流入至任縣西十

里注滏陽河落莫水在縣西南十八里至南和縣注滏陽河近

為漳洺諸流所併

縣故城在今縣西北

沙邱臺在縣東北班固云紂所作沙邱臺在鉅鹿縣東北七十

里

鉅鹿縣簡西南至府一百二十里 有圍城一鎮原莊一堡

漢置南樂縣屬鉅鹿郡晉初省石趙復置後魏太平眞君六年

併入栢人太和二十年又置曰南樂縣屬南趙郡北齊廢隋開

皇六年復置大業初改曰鉅鹿屬襄國郡唐武德元年于縣置起州四年州廢屬趙州貞觀元年還屬邢州

南嶽故城在縣北又故縣在今縣南宋大觀中徙今治唐白起廢縣在縣西南

柴城在縣東北三十里

廣宗縣 疲西至府一百二十里 有孝路一堡

漢鉅鹿堂陽二縣地後漢分堂陽置經縣屬安平國後魏真君二年併入南宮永安二年復置西經縣屬鉅鹿郡北齊省隋以後為平鄉縣地元憲宗五年始分平鄉置廣宗縣至元二年省入平鄉後復置屬順德路明洪武十年省入平鄉鉅鹿二縣十三年復置

漳水自山東邱縣分為二支一東北入廣平府威縣一北入縣

南又北逕平鄉鉅鹿入趙州甯晉縣與滏陽河合史記項羽救鉅鹿軍漳南按古漳水自曲周流逕平鄉東廣宗西入鉅鹿界唐宋時流逕平鄉南和二縣東自明以來始徙合滏陽本朝康熙中又東徙自邱縣北逕廣宗西鉅鹿東注甯晉泊所謂新漳河也近年上流徑由館陶入衛不合滏陽矣又張甲河故瀆在縣東

經城故城在縣東

唐山縣 簡西南至府八十五里

春秋時晉柏人邑漢置柏人縣屬趙國後魏孝昌中屬南趙郡東魏改人曰仁隋屬襄國郡唐武德元年于縣置東龍州四年州廢縣屬趙州五年還屬邢州天寶元年改曰堯山宋熙寧六年省入內邱元祐初復置屬信德府金改曰唐山仍屬邢州元

至元二年併入內邱縣後復置屬順德路

千言山在縣西北樂史云衛詩出宿于千飲餞于言是此山也

又宣務山在縣北

柏人故城在縣西

內邱縣 衝南至府六十里 有馬驛一金堤一堡

漢置中邱縣屬常山郡後漢屬趙國晉後省入柏人後魏太和

二十一年復置屬南鉅鹿郡孝昌中屬南趙郡隋開皇初避諱

改曰內邱屬襄國郡唐武德四年屬趙州五年還屬邢州

鵲山在縣西舊名逢山班固云中邱縣逢山長谷水所出又青

山在縣西南隋置青山縣取名焉

泝水自趙州臨城縣流入縣及唐山二縣北又東逕隆平縣至

任縣東北入大陸澤郭璞云泝水出中邱縣西窮泉谷又沙溝

水在縣北五里礪水在縣西北十三里注沙溝

中邱故城在縣西青山故城在縣西南

伯陽城在縣界

任縣 簡西南至府三十五里 有新店一鎮

春秋晉任邑漢置任縣及張縣俱屬廣平國後漢省張縣以任

縣屬鉅鹿郡建安十七年割屬魏郡晉仍屬廣平後魏永安中

屬北廣平郡高齊廢隋開皇十六年復置大業初廢入南和縣

唐武德四年復置屬邢州宋熙寧五年又省入南和元祐元年

復置屬信德府元至元二年省入邢臺後復置屬順德路

雞爪河在縣東北西接大陸澤之下流東至隆平縣合滏陽河

縣境順水河聖水河注蓼水蔡河馬河又合聖水河

大陸澤在縣東北與鉅鹿縣及趙州隆平縣接界書禹貢恒衛

既從大陸既作又導河北過洛水至于大陸爾雅晉有大陸班固云鉅鹿禹貢大陸澤在北核大陸一名鉅鹿故呂不韋書九藪趙有鉅鹿也

縣故城在今縣東南張縣故城在縣西南石趙苑鄉故城在縣東北十八里漢廣鄉故縣在縣界

廣平府

原額人丁三十五萬四千二百十五
又滋生人丁五千五百九十一屯丁一萬九百十三

禹貢冀州之域春秋屬晉戰國屬趙秦為邯鄲郡地漢初分置廣平郡征和二年改平于國五鳳二年復為廣平國屬冀州後漢建武十三年省廣平國為鉅鹿郡地建安十七年割屬魏郡十八年分置魏郡西部都尉三國魏黃初二年復置廣平郡晉屬司州後周宣政元年于郡置洺州隋開皇初廢郡存州大業

初改州為武安郡唐武德初復曰洺州二年陷竇建德四年建德平立山東道大行臺五年罷行臺置大總管府六年罷總管天寶元年復曰廣平郡乾元元年復曰洺州屬河北道宋仍曰洺州廣平郡屬河北西路元太宗八年置邢洺路憲宗二年為洺磁路至元十五年改廣平路隸中書省明洪武初曰廣平府本朝因之通判駐臨洺關

府境

東	西	南	北
東至山東臨清州界一百里	西至河南武安縣界七十里	南至河南臨漳縣界八十三里	北至順德府南和縣界五十二里
東至大名府治一百二十里	西至河南林縣治三百里	東至順德府廣宗縣治一百四十里	西北至順德府治九十里
自府治至	京師九百五十里		

八到

土貢 綱絹 磁石 磁器 磁石 磁器 鹽 油衣 人參 稻蓮 梨 藍 元精石

管縣九州一

永年 曲周 肥鄉 雞澤 廣平 邯鄲 成安

威 清河 磁州

永年縣 衝繁郭下 有黃龍大籛牛家堡曲陌四鎮

春秋晉曲梁邑漢置曲梁縣屬廣平國後漢屬魏郡晉屬廣平郡後魏為廣平郡治北齊省曲梁改置廣平縣隋仁壽元年避諱改曰永年大業初為武安郡治唐為洺州治元為廣平路治聰明山在縣西六十里相近有狗山

洺水今名沙河自順德府沙河縣流入縣北又逕雞澤縣西仍入順德府界

雞澤在縣西南春秋襄公三年同盟于雞澤

廣平故城在縣西北漢臨洺故城在縣西十五里

建德城在縣北二十五里五花城在縣西北三十里

臨洺關在縣西四十五里

曲周縣 繁西南至府四十里 有馬羅香城固二堡

漢武帝建元四年置曲周縣屬廣平國後漢屬鉅鹿郡晉省後魏景明中分平恩置曲安縣屬廣平郡北齊省隋開皇六年復置曲周縣屬洺州大業初併入洺水縣唐武德四年復置屬洺州宋熙寧三年省為鎮入雞澤縣元祐二年復置尋復廢四年又置屬洺州元屬廣平路

大河故瀆有二一在縣東五十里宋元豐間大河經流于此其後南徙遺跡僅存又有潞河故瀆在縣東長十五里東接漳河枯瀆今堙

阿難渠在縣南又董塘陂在縣西北魏晉時導漳水入陂為灌
漑之利今堙

縣故城在今縣東北宋時移今治相近有古鉅橋倉漢斥章故
城在縣東南

肥鄉縣簡西北至府三十五里
有新安一鎮南陽毛演二堡

漢置列人縣屬廣平國又置邯溝縣屬魏郡後漢省邯溝以列
人屬鉅鹿郡魏黃初二年分置肥鄉縣皆屬廣平郡後魏改屬
魏郡東魏天平初併肥鄉入臨漳縣高齊又省列人縣隋開皇
十年復置肥鄉縣屬慈州十六年改屬洺州唐武德初屬紫州
六年還屬洺州元屬廣平路

縣故城及漢卽裴故城在今縣西邯溝故城在縣西北列人故
城在縣東北隋清漳故城在縣東

葛孽城在縣西南二十里新興城在縣東南

雞澤縣被難西南至府六十里
有浮圖店小寨二堡

漢置廣平縣為廣平國治後漢省廣平國以縣屬鉅鹿郡三國
魏仍為廣平郡治晉後省後魏太和二十年復置北齊併入廣
平縣隋開皇十六年于廣平城復置雞澤縣大業三年省唐武
德四年復置屬洺州元初又併入承年後復置屬廣平路

舊滏河在縣西舊自承年縣流入又北達平鄉縣入甯晉泊故
渠紆曲常致潰決

本朝康熙七年知縣姜炤復開新河二里許以導其流

縣故城在今縣南金大定元年移今治廣平故城在縣東唐普

樂故城在縣東南

廣平縣簡西北至府六十里
有東韓村平固孟固焦家四堡

漢魏郡魏縣地金大定七年始分置廣平縣屬洺州元屬廣平

路
拳壯河在縣東十里本漳河支流康熙中漳河東徙自縣西南
又北分即行此渠

鶯城在縣西

邯鄲縣街繁疲東北至府五十里

有代召一鎮河沙
王化戶村三堡

春秋時衛邑後屬晉戰國為趙國都秦始皇十九年置邯鄲郡
漢高帝四年改置趙國治邯鄲縣景帝七年復為邯鄲郡五年
復為趙國屬冀州建安十七年國廢以縣屬魏郡三國魏屬廣
平郡晉後又屬魏郡後魏太平真君六年還屬廣平東魏天平
初併入臨漳縣隋開皇十六年復置屬武安郡唐武德四年屬
磁州貞觀元年屬洺州永泰元年又屬磁州明洪武初改屬廣

平府

堵山在縣西三十里紫山南山勢如堵牆故名又張晏云邯山
在邯鄲東城下酈道元云牛首水東歷邯鄲阜張晏所謂邯山
也

滏水今名滏陽河源出磁州神農山東北流入縣東三里又逕
永年曲周雞澤入順德府界山海經神囷之山滏水出焉東流
注于歐水淮南王書滏出景高誘注景山在邯鄲西南釜水所
出南入漳又洺河自河南武安縣流入縣西北三十里遶紫山
之北二流雙導仍合為一又東逕永年雞澤入順德府界按李
吉甫云洺漳二水至雞澤東南二十五里合流今則逕永年雞
澤二縣西北至南和蓋今昔異流矣

渚沁二水並在縣境亦名西河即古牛首拘澗水也班固云邯

鄆縣堵山牛首水所出東入白渠又武始縣有拘澗水東北至邯鄲入白渠按今二水分入滏水與古異

古白渠在縣及肥鄉二縣界按今滏水所經即白渠故道也縣故城及漢武始故城並在今縣西南

五氏城在縣西亦曰寒氏春秋定公九年齊侯衛侯次于五氏又左傳衛侯伐邯鄲于寒氏注即五氏也王郎城在縣西三里

成安縣簡北至府六十里有郭方鄭家莊北漳周村四堡

春秋晉乾侯邑漢置斥邱縣屬魏郡東魏天平初併入臨漳北齊改置成安縣屬清都尹隋屬魏郡唐武德元年屬磁州貞觀元年還屬相州天祐二年復曰斥邱三年屬魏州五代後唐復曰成安宋屬大名府金屬洺州元至元二年併入滏陽後復置

屬磁州明改屬廣平府

斥邱故城在縣東南

威縣難西南至府一百十里有邵固七級章華三堡

漢鉅鹿縣地後漢章帝分置廣宗縣屬鉅鹿郡晉屬安平國石趙于縣置建興郡尋罷後魏太和十一年置廣宗郡尋罷孝昌中復置屬司州隋仁壽元年避諱改曰宗城屬清和郡唐武德四年于縣置宗州九年州廢屬貝州天祐三年復曰廣宗屬魏州五代後唐復曰宗城宋屬大名府金改屬洺州又增置洺水縣元初省宗城入洺水憲宗二年自井陘移威州來治至正中省洺水入威州明初降為縣

張甲河故瀆自山東臨清州流入縣南又北逕清河縣西入冀州南宮縣界班固云信成張甲河首受屯氏別河東北至蓆入

漳又清河故瀆自山東館陶縣流入縣東又東北逕清河縣西入山東武城縣界洺河故瀆在縣南五里東南達于黃河與運河合流

廣宗故城及隋宗城故城在縣東石趙建始故城在縣東北後魏經城故城金洺水故城在縣北

上白城在縣南又古界橋在縣北後漢初平三年袁紹及公孫瓚戰于界橋

清河縣簡西南至府一百八十里

有甯化一鎮謝爐蓮冢二堡縣丞駐曲坊營

漢高帝置清河郡治清陽縣領信成等縣後漢建初七年為清河國建和二年移國治甘陵省清陽信成皆入之晉及後魏為清河縣地北齊始移清河郡及縣于故信成縣改縣曰武城後周宣政元年于郡置貝州隋開皇初郡廢仍改州治武城縣曰

清和大業初復為清河郡唐武德四年復曰貝州開元二十三年兼移清陽縣于州治天寶元年改清河郡乾元元年復曰貝州屬河北道五代晉天福三年于州置永清軍節度周顯德初軍廢宋初復置永清軍慶曆八年軍罷改曰恩州熙甯四年省清陽縣入清河金移恩州治歷亭以清河為屬縣元太宗七年割屬大名路明初改屬廣平府

衛河在縣東南二十五里自山東臨清州流入與夏津縣分界又東北入山東武城縣界即古屯氏別河故道亦名永濟渠隋大業四年所開引沁水南達于河北通涿郡者也又故漳渠在縣南疏水渠在縣東

信成故城在縣西北清陽故城在縣東隋夏津故城在縣東南末極城在縣東北

磁州

衝繁東北至府一百二十里

有二祖昭德臺城三鎮林壇王家莊二堡

漢魏郡武安縣地後周分置滏陽縣隋開皇十年于縣置慈州大業初州廢屬魏郡唐武德元年復置磁州貞觀元年州廢屬相州永泰元年復置天祐三年改曰惠州五代唐復曰磁州宋曰磁州滏陽郡元太祖十年升滏源軍節度屬真定路太宗八年屬邢洺路憲宗二年屬洺磁路至元十五年屬廣平路明洪武初省滏陽縣入州屬河南彰德府

本朝雍正四年改屬州判駐彭城

漳水自河南林縣流入州南又東入河南臨漳縣界又東逕成安縣南至廣平縣西南分為二流一東流逕大名府魏縣至山東館陶入衛一東北流逕廣平縣入山東邱縣南又分為二一東北逕威縣清河至冀州南宮縣曰老漳河一北流至順德府

廣宗縣界曰新漳河又古汙水在州西舊注漳賀蘭等河又注滏水

五爪渠在州西十里

漢梁期故城在州東魏臨水故城在州西北周廢安州城在州東北六里

九侯城在州西南臺城在州東北二十里較城在州西二十五里講武城一在州南二十里一在州西王城在州西北五十里岳城在州西南五十里

元年升為東京興唐府三年改為鄴都晉天福初改為廣晉府
漢乾祐元年始改曰大名府周顯德元年罷都仍為天雄軍節
度宋慶歷二年建為北京熙寧六年分為河北東路金初為散
府正隆二年升為總管府置大名府路貞祐二年置行尚書省
元曰大名路屬中書省明曰大名府

本朝雍正三年以內黃改屬河南彰德府濬滑二縣改屬河南
衛輝府分巡大順廣兵備道駐此督捕通判駐東明

府境

東西距一百二十里
南北距三百六十里
東至山東冠縣界四十里
西至河南臨漳縣界八十里
南至河南儀封縣界二百八十里
北至山東館陶縣界五十里
東南至山東定陶縣界三百里
西南至河南內黃縣界九十里
東北至山東臨清州界一百五十里
西北至廣平府成安縣界八十里

自府治至京師一千一百二十里

土貢

綱絹 角弓 席 紙 紫草 胡粉 硝 醃 枝
頭乾 梨 櫻桃 棗

管縣六州一

元城 大名 南樂 清豐 東明 開州 長垣

元城縣

繁郭下 有小灘東館二鎮臺頭一堡

漢置縣屬魏郡三國魏為陽平郡治後魏移郡治館陶以元城
為屬縣東魏天平初改屬魏郡又析置貴鄉縣北齊省元城入
貴鄉後周于貴鄉縣置魏州隋開皇六年復置元城縣大業初
以貴鄉為武陽郡治唐初復于貴鄉置魏州貞觀十七年又併
元城入貴鄉聖歷二年又置屬魏州開元十三年移入州郭與
貴鄉皆為州治五代唐改元城曰興唐晉復曰元城又改貴鄉
曰廣晉漢乾祐初改廣晉曰大名元至元二年併元城入大名

尋復置為大名路治

沙麓山在縣東春秋僖公十四年沙鹿崩公羊傳沙鹿者何河上之邑也穀梁傳林屬于山為鹿沙山名也

屯氏河故瀆在縣東北漢書自塞宣防後河復北決于館陶分為屯氏河東北經魏郡清河信都勃海入海廣深與大河等又沙河在縣東大河支流也今堙

魏州故城在今府東俗名舊府城縣故城凡三皆在今縣東又隋馬陵故城在縣東南春秋成公七年同盟于馬陵李吉甫云齊將孫臏殺龐涓于此

五鹿城有二一在縣東一在開州南左傳僖公二十二年晉公子重耳過衛出于五鹿酈道元稱京相璠曰在衛縣西北三十里即今開州也又陽狐城空陵城在縣東北幾城在縣東南魏

武侯城在縣南十里

沙亭在縣東南春秋定公七年齊侯衛侯盟于沙左傳作瑣王隱云元城縣南有瑣陽城即此

金堤在縣舊府城北十九里南與河南滑縣接界繞古黃河歷開州清豐南樂大名元城東北接山東館陶界即漢時古堤也漢書成帝建始四年河決東郡金堤

大名縣

繁難近郭北少西距府八里

有李固雙井北阜回龍四鎮沙口一堡縣丞駐

本漢元城縣地東魏以後為元城貴鄉二縣地五代為元城大名二縣地宋政和六年自府城徙大名縣治南樂鎮金仍移入府郭元至元九年復還舊治明洪武初省入元城三十一年復置于府郭永樂九年復還故治

本朝乾隆二十三年移治府城北省魏縣入之

恆山在縣北李吉甫云貴鄉縣古堰今名恆山

衛河亦名白溝水自河南內黃縣流入縣南又東北逕元城縣東入山東館陶縣界亦名永濟渠又名御河又漳水有新舊二支並自河南臨漳縣流入縣及元城二縣境又東北入館陶界洹水在故魏縣西南三十里亦自臨漳縣流入古洹水支流也今並入漳河

魏縣故城有二一在縣西北五十里近所併一在故魏縣南漢縣也又後周洹水故城在故魏縣西南隋漳陰故城在故魏縣

西

南樂縣 簡西北至府五十里 有韓張一鎮

漢置樂昌縣屬東郡後漢廢後魏太和二十一年分魏縣置昌

樂縣永安初置昌樂郡東魏天平中郡廢縣屬魏郡隋開皇六

年析置繁水縣大業初省昌樂入繁水屬武陽郡唐武德五年

復置昌樂縣屬魏州貞觀十八年省繁水入焉五代唐改曰南

樂宋初屬大名府崇甯四年改屬開德府金還屬大名府

昌樂故城及繁水故城在縣西北東魏平邑故城在縣東北

昌城在縣南朝城在縣東二十五里

清豐縣 難北至府九十里 有主簿寨許村馬村三堡

漢置頓邱縣屬東郡後漢建安十七年割屬魏郡晉泰始二年

于縣置頓邱郡北齊郡縣俱廢隋開皇六年復置頓邱縣屬武

陽郡唐初屬魏州武德四年于縣置澶州貞觀元年州廢還屬

魏州大歷七年復置澶州又析置清豐縣屬之五代晉天福三

年州徙德勝寨縣隨州徙廢舊州為頓邱鎮四年改鎮置德清

軍宋慶歷四年徙清豐縣治德清軍熙甯六年廢頓邱入清豐屬開德府金屬開州明初改屬大名府

縣故城在今縣西頓邱故城在縣西南漢陰安故城在縣北德清軍故城在縣西北

觀澤城在縣東衛城在縣東南四十里孫固城在縣東南十五里

東明縣繁難北至府二百二十里有杜勝一集巡檢駐

漢置離狐縣屬東郡後漢建初四年改屬濟陰郡隋仍屬東郡唐屬曹州天寶元年改曰南華金初為河所圯省入宛句尋移東明縣來治仍屬曹州元太宗七年改屬大名路至元二年改屬開州明洪武初省入長垣宏治四年復置屬大名府萬曆中嘗屬開州

本朝復故

洪河在縣東南三里自河南滑縣流入又東北會濮水入山東濮州界又漆水在縣北門外東流合洪河賈魯河在縣東南古濟水在縣及長垣二縣南北濟也

縣故城有三一在河南蘭陽縣界漢縣也一在今縣南三十里今日南東明集一在縣西十五里今日西東明集又離狐故城在縣東南

漆園城在縣東煮棗城在縣東南武父城在縣西南春秋桓公十二年公會鄭伯盟于武父

開州繁渡難北至府一百二十里有馬驛一土樓古定二鎮慶祖井店二堡

古顛頊之墟禹貢兗州之域夏時為昆吾國春秋曰帝邱為衛國都戰國曰濮陽仍為衛都秦始皇五年置東郡漢以濮陽縣

爲東郡治晉咸甯三年改置濮陽國仍治濮陽縣東晉後郡移治鄆城以濮陽爲屬縣隋屬東郡唐屬濮州五代晉天福三年改置澶州四年移濮陽縣入州治開運元年升爲鎮甯軍節度宋曰澶州澶淵郡鎮甯軍節度崇甯四年建爲北輔五年升爲開德府宣和二年罷輔郡屬河北東路金仍曰澶州皇統四年改曰開州屬大名府路明洪武初以州治濮陽縣省入洪洋山在州東南五里按山海經鮒鯁山樂史云在頓邱縣西北三十里又云衛陽山在縣東南二十里今皆不知所在古黃河有三道一自河南滑縣流入州西北又東北逕清豐南樂元城入山東館陶界此西漢以前之故道也一自滑縣流入逕州西南又東北逕清豐南入山東觀城縣界此東漢以後及唐時故道其自州境又東北逕大名元城之東者宋時北流故

道也又稍河亦自滑縣分爲二一東北流逕州西爲馬頰河又逕清豐南樂大名元城下流入山東朝城等縣一由河南內黃縣東北逕大名縣東注三角潭

瓠子河故瀆在州南澶水在州西南大河分流也一名繁水又名浮水春秋襄公二十年盟于澶淵

濮陽故城在州西南昆吾故城在州東隋臨河故城在州西唐澶水故城在州西二十里

浚城在州南詩衛風在浚之南干城在州北詩出宿于干城城在州東南六十里春秋僖公十有三年會于鹹城在州北七里春秋文公元年公孫敖會晉侯于戚城在州西北左傳襄公二十六年晉討衛疆戚田取衛西鄙懿氏六十以與孫氏按五代梁故德勝城亦在州境今州治卽德勝北城也

旄丘在州西詩衛風旄丘之葛兮清丘在州東南七十里春秋
宣公十二年同盟于清丘鐵丘在州北春秋哀公二年晉趙鞅
及鄭罕達戰于鐵瑕丘在州東南十八里義井里禮記檀弓公
叔文子升瑕丘

長垣縣

繁疲難東北至府二百五十里

有大岡一鎮

春秋衛地戰國魏首垣邑漢置長垣縣屬陳留郡後漢為侯國
晉復為縣後魏太平真君八年併入外黃景明五年復置屬東
郡隋開皇十六年改曰匡城唐屬滑州五代梁復曰長垣屬開
封府後唐復曰匡城宋建隆元年改曰鶴丘尋復曰長垣金泰
和八年以限河不便由開封改屬開州元初屬大名路至元二
年仍屬開州
本朝屬大名府

濮水自河南封邱縣流入縣北又東逕東明開州合洪河入山
東濮州界

縣故城在今縣東北漢平丘故城隋匡城故城在縣西南漢長
羅故城在縣北

祭城在縣東北龍城在縣南鶴城在縣西南訾婁城在縣西左
傳僖公十八年衛侯師于訾婁婦姑城在縣南十里

宛亭在縣西南左傳僖公二十八年甯武子與衛人盟于宛濮
宣化府

衝繁雜

原額人丁五萬九千三百八十五
又滋生人丁四千五百十三

禹貢冀州之域周幽州之域春秋戰國時為燕地秦為上谷郡
地漢置廣寧等縣屬焉晉分上谷置廣寧郡後魏兼置燕州北
齊屬北燕州後周屬燕州隋屬涿郡唐初屬媯州唐末始置武

州屬河東道石晉天福初入契丹改曰歸化州兼置雄武軍屬
西京道宋宣和五年來歸尋復入金大定七年改曰宣化州八
年又改曰宣德州屬西京路元初升為宣甯府太宗七年改山
東路總管府中統四年改宣德府屬上都路後至元三年改順
甯府明洪武四年府廢二十六年置宣府左右前三衛隸北平
都指揮使司永樂七年直隸京師又置總兵鎮此稱宣府鎮宣
德五年置萬全都指揮使司

本朝康熙三十二年改置宣化府分守口北道駐此理事同知
三駐張家口獨石口及多羅諾爾巡檢一亦駐多羅諾爾

府境 東西距三百六十里
南北距二百七十五里
東至邊界二百七十五里
西至山西大同府邊界一百四十五里
南至保定府涑水縣界二百十里
北至張家口邊界六十五里

八到

東南至順天府昌平州界二百五十里
西南至山西廣靈縣界二百六十里
東北至獨石口邊界三百十里
西北至邊界一百六十里
自府治至京師三百四十里

土貢

金銀 水晶 瑪瑙石 碧紅石 花斑石 磁石
石炭 煤 礬 松實 豹 熊 青羊 熊膽 鹿茸 麝香

管縣八州三

宣化 赤城 萬全 龍門 懷來 蔚州 蔚縣 西

寧 懷安 延慶州 保安州

宣化縣 衝繁難郭下 有雞鳴驛深井甯遠站三堡

漢置廣甯縣屬上谷郡晉省入下洛縣唐初為懷戎縣地後析
置文德縣為武州治遼為歸化州治金大定二十九年改縣曰
宣德為宣德州治元為宣德府治明洪武初府縣俱廢二十六

年改置宣府左右前三衛

本朝初省左右二衛入前衛為宣府鎮治康熙三十二年改置宣化縣為府治

鷄鳴山在縣東南

黑城川水今名泥河在縣東十五里西南流與洋河合

廣寧故城及漢寧縣故城在縣西北茹縣故城在縣南且居故城在縣東

赤城縣

衝西南至府一百七十里

有雲州驛滴水厓鎮寧馬營松樹鎮安楊田清泉七堡縣丞駐獨石口

本漢上谷郡北境後魏禦夷鎮地唐為媯州地遼置望雲縣屬奉聖州金屬德興府元中統四年升為雲州明初州廢宣德五年置赤城堡

本朝初屬宣府鎮曰上北路康熙三十二年改置赤城縣以縣東赤城山為名

沽河源出邊外自獨石口流入逕獨石城西入縣東又東逕延慶州東北界仍出邊外又湯泉河在縣西

雲州故城在縣北禦夷鎮城在縣東北

白城古長城並在縣北

獨石口在縣東北一百里其南十里為獨石城本元雲州獨石地明初建城置守于此

萬全縣

衝繁難東南至府八十里

有張家口膳房新河口洗馬林四堡縣丞駐張家口

本漢上谷郡寧縣地唐為武州文德縣地元為宣德府宣平縣地明洪武二十六年置德勝堡永樂二年移萬全右衛治此十

六年直隸京師宣德中屬萬全都指揮使司

本朝初屬宣府鎮為西路康熙三十二年改置萬全縣

甯川水今名清水河源出邊外自張家口流入南逕縣東又南至宣化縣界入洋河又愛陽川在縣炭山西北二十里本放牧之地深二尺餘下有頑冰黑色者數尺上有浮草性涼尤宜牧馬

零丁城在縣北

龍門縣

簡西少南至府一百十里

有長安驛葛峪趙川龍門關長安嶺雕鸞五堡

漢置女和縣屬上谷郡為東部都尉治後漢省唐末置龍門縣屬新州遼屬奉聖州金初屬宏州後屬德興府明昌三年又改屬宣德州元至元二年廢為鎮屬宣德縣二十八年改置望雲縣屬雲州明初州縣俱廢宣德六年置龍門縣屬萬全都指揮

使司嘉靖元年分為中路

本朝屬宣府鎮順治六年改曰下北路康熙三十二年復置龍門縣

大松山在縣西遼開泰九年如鴛鴦灣獵于松山

陽樂水在縣南東流至赤城縣界入沽河班固云且居縣陽樂

水出東南入海又柳河川在縣西金大定七年幸柳河川

女和故城在縣東

廣邊城在縣東鵬鶚堡東羊城在縣東南三十里

懷來縣

衝繁西北至府一百五十里

有土木驛巡檢一駐沙城

戰國燕置上谷郡漢置沮陽縣為郡治後魏時郡縣俱廢齊周及隋為懷戎縣地唐垂拱中分置清夷軍長安二年始移懷戎縣及媯州來治天寶初曰媯州郡乾元初復曰媯州五代晉天

福元年入契丹改州曰可汗縣曰懷來金初州廢明昌六年改縣曰媯川屬德興府元復曰懷來縣延祐二年改屬龍慶州明洪武初改懷來守禦千戶所永樂十五年改懷來左衛十六年曰懷來衛直隸京師宣德中改屬萬全都指揮使司

本朝初屬宣府鎮為東路康熙三十二年復改為懷來縣軍都山在縣南五十里東西極高南與順天府昌平州接界漢軍都縣以此名

沮陽故城在縣南

甯武城在縣西六郎城在縣東南

蔚州

衝疲難東北至府二百三十里

有馬驛一長寧神道溝二鎮桃花石嶺二堡九官宛央興甯直塔四口

春秋時代國戰國屬趙置代郡漢初為代國尋為代郡治桑乾

縣兼領代縣後漢移郡治高柳以二縣屬之晉移郡治代縣永嘉後廢後魏復置代郡孝昌中廢東魏天平中屬靈丘郡隋為靈丘縣地唐開元十二年始分置安邊縣屬蔚州天寶初自靈丘移州來治改曰安邊郡至德二載并改安邊縣曰興唐乾元初復曰蔚州五代晉初改縣曰靈仙天福元年割屬契丹仍為蔚州置忠順軍屬西京道宋宣和五年屬雲中路六年仍入金屬西京路元至元二年州廢縣屬宏州尋復置州改屬宣德府明洪武四年以州治靈仙縣省入屬山西大同府本朝雍正六年改屬宣化府又省蔚縣入焉

馬頭山在州東南酈道元云魏土地記曰代城東南二十五里有馬頭山其側有鐘乳穴趙襄子既害代王其姊代夫人磨笄自刺而死民憐之為立神屋于山側因名之為磨笄山又倒刺

山在故蔚縣東酈道元云倒刺山甚層峻未有升其嶺者

祁夷水在州北亦曰漚夷河今名壺流河自山西廣靈縣流入東北逕故蔚縣界入桑乾河又州境飛狐谷水熱水倒刺山水並注祁夷水

漢東安陽故城在州西北昌平故城在州北代縣故城當城故城離晉故城在故蔚縣東桑乾故城及遼定安廢縣在故縣東北代東城王郎子城並在故蔚縣東北

隘門關在州西南四十里石門峪飛狐關在故蔚縣南孔嶺關在縣東北

西甯縣 渡東北至府二百里 有丁甯一口

漢置陽原縣屬代郡後漢省唐為興唐縣地遼統和中置永甯縣兼置宏州改軍曰保甯尋廢大定七年改縣曰襄陰元至元

中以襄陰縣省入州屬大同路明初州廢天順四年築城曰順聖川西城屬萬全都指揮使司

本朝初屬蔚州衛康熙三十二年改置西甯縣

濕水一名桑乾河自山西天鎮縣流入縣南及蔚州北又東逕宣化及保安州南與洋河會又東南入順天府界又西沙河在縣東南流注桑乾河

陽原故城在縣南又遼順聖廢縣在縣東六十里

懷安縣 衝繁東少北至府一百二十里 有萬全驛柴溝西陽河李信屯會河四堡

本漢上谷郡下落縣地唐末置懷安縣屬新州遼初屬奉聖州後改屬大同府元初屬宣德府中統三年改屬興和路明初縣廢洪武二十六年改置懷安衛屬萬全都指揮使司

本朝初屬宣府鎮康熙三十二年改爲縣

于延水今名洋河自山西天鎮縣界流入縣北又東逕萬全宣化保安州東合桑乾河縣境延鄉水今名西洋河雁門水今名南洋河託台谷水今名水溝口河並注于延水

漢馬城故城後魏大寧郡城並在縣北唐懷安舊縣在縣東金宣平廢縣在縣東北陽門廢縣在縣北故萬全左衛在縣東北六十里

岡城在縣東北沙城在故萬全左衛西北九王城在衛北五里延慶州衝繁難西北至府二百里

有宏陽一鎮靖安四海冶二堡峒道一口巡檢駐永甯

秦上谷郡地漢置居庸縣屬上谷郡後魏孝昌中陷廢天平中復置仍屬上谷郡高齊縣廢爲懷戎縣地唐天寶中析置媯川

縣屬媯州唐末改置縉山縣兼置儒州五代晉天福元年入契丹置縉陽軍金皇統元年州廢以縣屬德興府崇慶元年復升爲鎮州元初州廢至元三年省縣入懷來五年復置屬奉聖州延祐三年升爲龍慶州明洪武初州廢永樂十一年復置曰隆慶州直隸京師隆慶元年避年號改曰延慶州

本朝初屬宣府鎮爲東路康熙三十二年屬府大翻山在州西北與小翻山相連又獨山在州境永甯城西北十五里

八達嶺在州南三十三里距居庸上關十七里爲往來衝要清夷水今亦名媯河源出州東北西流逕州城南又逕懷來縣入桑乾河又州境滄河板橋河溫泉河等並注清夷水馬蘭溪水又合澤水注清夷水粟水又注滄河又有溪水出邊外入沽

河

居庸故城在州東夷輿故城在州東北

永甯城在州東四十里隆鎮衛城在州南

保安州

簡北少西至府六十里

有礬山沙城麻峪口三堡
天門關馬水二口

秦上谷郡地漢置下洛涿鹿潘三縣皆屬上谷郡晉太康中分置廣甯郡治下洛以涿鹿潘縣屬之後魏太和中兼置燕州孝昌中陷廢北齊改置懷戎縣兼置北燕州及長甯永豐二郡周去北字隋開皇初郡廢大業初州廢以懷戎縣屬涿郡唐武德七年復置北燕州貞觀八年改曰媯州長安二年徙治居庸界光啟中改置新州兼置永興縣為州治後唐同光元年置威塞軍晉天福元年入契丹改曰奉聖州武定軍金大安元年升為德興府治德興縣元至元三年復降為奉聖州改縣曰永興屬

宣德府後至元三年改曰保安州屬順甯府明洪武初州縣俱廢永樂十三年復置保安州直隸京師

本朝初屬宣府鎮為東路康熙三十二年屬宣化府

涿鹿山在州南史記黃帝與蚩尤戰于涿鹿之野服虔曰涿鹿山名又橋山亦在州南魏書泰常七年如廣甯幸橋山遣使者祠黃帝帝堯廟釜山在州西南史記黃帝合符釜山

涿水在州東南酈道元云涿水出涿鹿山世謂之張公泉東北逕涿鹿縣故城南又東北與阪泉合又東逕平原郡南又東北逕祚亭北東北入濕水又潘泉水在州西南溫泉水在州南北流注濕水礬山水在州東南南流至易州界注涑水

下洛故城在州西涿鹿故城在州南潘縣故城在州西南唐礬山故城在州東南六十里

蚩尤城平原城在州東南無鄉城在州南雍洛城在州西藥師城在州東合河鎮

協陽關在州西南美峪關在州南六十里

遵化州 衝繁難 有馬驛一石門一鎮大安千家峪羅文峪

原額人丁 又滋生人丁

漢置徐無後靡二縣屬右北平郡晉移北平郡治徐無後省後靡縣人之後魏太平真君七年郡廢以縣屬漁陽郡後周省徐無入無終唐為玉田縣地五代唐始置遵化縣屬薊州遼重熙中于縣置景州清安軍宋宣和四年賜名灤川郡金廢州以縣屬薊州

本朝康熙十五年以陵寢所在升縣為州屬順天府至乾隆八年復升為直隸州割

永平府玉田豐潤二縣屬焉

州境

東西距一百六十里
南北距三百二十里
東至永平府遷安縣界五十里
西至順天府薊州界七十里
南至順天府河縣界三百里
北至羅文峪關二十里
東南至永平府灤州界二百二十里
西南至順天府寶坻縣界一百三十二里
東北至喜峯口關一百二十里
西北至馬關峪六十里
自州治至京師三百二十里

土貢

角弓 栗 白膠 玉田砂 人參 梅 米

管縣二

玉田 豐潤

昌瑞山在州西北七十里本名豐臺嶺康熙二年封為昌瑞山徐無山在州西後漢建安中田疇入徐無山營深險平敞地而

居之酈道元云庚水南流歷徐無山開山圖曰山出不灰之木生火之石

庚水今名沽河源出州東界曰梨河又西逕順天府薊州南爲沽河折而南與洵河會曰潮河班固云無終縣溷水西至邕奴入海過郡一行六百五十里按舊圖以玉田縣之還鄉河爲庚水沽河爲溷水今以酈注考之沽河卽庚水還鄉河乃巨梁水遵化州西之沙河蓋溷水也又濡水今名灤河在州東七十里源出獨石口外流逕承德府境會諸水入邊又東南入永平府界又沙河在州西會諸水入濡

徐無故城在州西俊靡故城在州西北

平安城在州西南五十里徐太傅城在州西喜峯口東北

馬蘭關在州西北七十里有堡城在關南十里

玉田縣

衝繁難西北至州二十里

有馬驛一

本漢右北平郡無終縣地隋末改無終爲漁陽縣唐武德二年分漁陽別置無終縣貞觀元年省乾封二年復置屬幽州萬歲通天二年改曰玉田神龍元年改屬營州開元四年還屬幽州八年復屬營州十一年又屬幽州十八年改屬薊州宋宣和七年于縣置經州七年入金仍屬薊州

本朝初屬順天府雍正三年改屬永平府

燕山在縣北接豐潤縣界晉咸平四年石虎攻段遼遼北平相陽裕登燕山以自固

北平城在縣界

豐潤縣

衝繁難西北至州七十里

有韓城一堡崖兒一口

漢置土垠縣屬右北平郡後漢移郡來治晉移郡治徐無以土

原屬之後魏改屬漁陽郡北齊廢唐爲玉田縣地金泰和中始分置豐間縣屬薊州元至元二年省入玉田四年復置明洪武初改閏曰潤

本朝康熙十五年改屬遵化州雍正三年改屬永平府尋又屬遵化州

巨梁水今名還鄉河源出永平府遷安縣西黃山西南流入縣西五里又逕玉田縣東南至順天府寶坻縣界入薊運河縣境沙流河韓城鎮河並注巨梁水玉田縣諸水並注薊運河

越支鹽場在縣南一百里接濟民場西北至斗沽接寶坻縣蘆臺場廣袤二百四十里

易州 衝繁 有上陳驛金陂一鎮盤石奇峯烏龍溝三口
原額人丁五萬八百七十六
又滋生人丁五百七十五

秦以前同宣化府漢置故安縣屬涿郡晉屬范陽國後改曰固安後魏屬范陽郡北齊天保七年廢隋開皇元年自遂城移南營州及昌黎郡于此改曰易州十六年始置易縣爲州治大業初改上谷郡唐武德四年復曰易州天寶元年復曰上谷郡乾元元年復曰易州屬河北道五代晉開運二年入契丹周顯德六年收復宋端拱二年復入遼置高陽軍宣和四年歸宋賜名遂武郡金屬中都路元初省易縣入州太宗十一年割屬順天府至元三年復置易縣爲州治十年屬大都路二十三年還屬保定路明初省縣入州

本朝雍正十一年升爲直隸州

州境 東西距二百八十里
南北距一百八十里

八到 東至順天府涿州界七十里
西至山西靈邱縣界二百十里

南至保定府安肅縣界五十里
北至順天府房山縣界一百三十里
東南至保定府定興縣界三十五里
西南至保定府滿城縣界九十里
東北至房山縣界七十里
西北至宣化府蔚州治三百里
自州治至京師二百二十里

土貢 綿 絹 粟 鏡 酒

管縣二

涑水 廣昌

孔山郎山五回山並在州西南白馬山在州北
易水在州南源出州西東流入保定府界亦名中易水周禮職
方并州其浸涑易班固云故安縣閭鄉易水所出東至范陽入
濡州境子莊溪水女思谷水並注易水又濡水在州北即北易
水也亦東南入保定府界班固云故安縣濡水亦至范陽入涑

州境源泉水渾塘溝水並注濡水在州南六十里源出州西
南東流入保定府界司馬彪云故安縣電水出酈道元云班固
闕駟之徒咸以斯水謂之南易

故安故城在州東南魏營丘故城在州南唐五迴廢縣在州西
一百里樓亭廢縣在州西北

古燕城在州南五里長城在州西南十里漸離城在州西南荆
軻城五公城在州西野狐城在州東山厥城在州西北三里

黃金臺在州東南王隱云段匹磾討石勒屯故燕太子丹黃金
臺

柴荆關在州西即太行蒲陰陘也宋時謂之金陵關金元以來
皆名柴荆關

涑水縣 衝繁西南至州四十里 有人安一寨馬水一口巡
檢駐黃莊

漢置迺縣屬涿郡晉曰迺縣屬范陽國周大象二年省入涿縣
隋開皇初改范陽爲迺更置范陽縣于此六年改曰固安八年
廢十年又于此置永陽縣十八年始改曰涑水屬上谷郡唐屬
易州宋太平興國六年省入易縣遼復置
本朝初與州共屬保定府雍正十一年專屬易州
檀山在縣西北檀山水出焉
涑水一名巨馬河源出廣昌縣南東流轉南入縣東又南入保
定府界班固云廣昌縣涑水東南至容城入河過郡三行五百
里并州寢又白澗水紫石溪水在縣西北督亢溝水桃水在縣
北並合涑水
迺縣故城及唐板城廢縣並在縣北
射魚城在縣西聖人城石泉城在縣西北

廣昌縣

簡東至州一百八十里

有倒馬關香山二驛孟良一寨飛狐浮圖峪甯靜庵白石狼牙五口

漢置縣屬代郡後漢屬中山國晉仍屬代郡後廢後魏時爲靈
丘縣地後周復置廣昌縣隋仁壽初改曰飛狐屬上谷郡隋末
廢唐武德六年復置屬蔚州明洪武初復改曰廣昌
本朝初屬山西大同府雍正十一年改屬易州
涑水今名唐河在縣南自山西靈丘縣流入又東南入保定府
界

縣故城在今縣北周大象二年移今治

紂王城在縣東十五里

三河冶在縣南唐元和七年中書侍郎李吉甫奏飛狐縣三河
冶銅山約數十里銅鑛至多去飛狐錢坊二十五里兩處司用

巨馬河水以水解銷銅北方諸處鑄錢人工絕省所以平日三
河冶置四十鑪鑄錢舊跡並存事堪覆實詔從之置五鑪鑄錢
倒馬關在縣南七十里飛狐口在縣北其地兩崖峭立一綫微
通迤邐百有餘里漢酈食其說高祖距飛狐之口即此

冀州

繁茂 有來遠一鎮曰村韓村二堡

原額人丁三十一萬三千六百五
又滋生人丁一千九百九

禹貢冀兗二州之域春秋晉東陽地戰國屬趙秦屬鉅鹿郡漢
高祖置信都國治信都縣景帝二年改為廣川國五年國除為
信都郡中二年復為廣川國宣帝甘露四年復曰信都國屬冀
州後漢永平十五年改曰樂成國延光元年又改曰安平國三
國魏始移冀州治此晉太康五年又改曰長樂國後魏曰長樂
郡仍為冀州治隋開皇初廢郡存州大業初州廢仍為信都郡

唐武德四年復曰冀州六年置總管府是年移州治下博貞觀
元年復治信都府廢龍朔二年改曰魏州咸亨三年復故天寶
初復曰信都郡乾元初仍曰冀州屬河北道宋慶歷八年置安
武軍節度使屬河北東路元亦曰冀州屬正定路明洪武六年
以州治信都縣省入屬正定府

本朝雍正二年升為直隸州

州境

八到

東至河間府故城縣界四十五里	南至趙州府威縣界七十里	西至廣平府清河縣界八十里	北至順德府鉅鹿縣治八十里	東南至廣平府清河縣治一百四十里	西南至順德府鉅鹿縣治一百八里	東北至保定府鹿鹿縣治七十五里	西北至保定府鹿鹿縣治七十五里	自州治至京師六百三十三里
---------------	-------------	--------------	--------------	-----------------	----------------	----------------	----------------	--------------

土貢

絹 綿 草履子 鹽

管縣五

南宮 新河 棗強 武邑 衡水

滹沱河在州北自保定府束鹿縣流入合漳溢二水又東北逕衡水武邑入深州武強縣界班固云信都縣故滹沱在北東入海按舊道自束鹿縣南過安平南深州北復東出饒陽縣北歷河間府獻縣交河而合漳水今自冀州合漳于是深州安平饒陽諸境皆無滹沱故跡矣古黃河在州及南宮縣東南棗強縣南

漢扶柳故城在州西南辟陽故城在州東南三十里昌成故城桃縣故城在州西北又隋澤成廢縣在州西

長堤在州西北抵甯晉新河縣境長百三十里以防滹沱漳河

之漲溢

南宮縣繁東北至州六十里

有長蘆字化二鎮董家廟一堡

漢置縣屬信都國後漢屬安平國後魏屬長樂郡北齊廢隋開皇六年復置仍屬信都郡唐武德四年屬宗州九年還屬冀州宋皇祐四年省入新河縣六年復置

本朝初屬正定府雍正二年與新河等四縣並還屬北冀州

泲水故道自順德府廣宗縣流入縣北又東北逕州城北衡水縣南至武邑縣合漳水亦名枯泲班固云信都縣禹貢絳水亦入海

通利渠在縣西五十九里唐延載元年開引漳水以溉田小河渠在縣東又新河縣有堂陽渠唐景龍元年開

縣故城在今縣西北漢繚縣故城在縣東南

新河縣

簡東少北至州六十里

漢置堂陽縣屬鉅鹿郡後漢改屬安平國後魏屬長樂郡北齊廢隋開皇十六年復置屬信都郡唐屬冀州五代晉改曰蒲澤割屬鎮州漢復故名周還屬冀州宋皇祐四年省堂陽升新河鎮為新河縣熙甯六年復廢為鎮入南宮元太宗四年復置屬冀州

胡盧河在縣北漳滏二水自趙州甯晉縣合流入縣境又東北逕州西北合滹沱河又東北逕衡水武邑二縣北入深州武強縣界即古衡漳及長蘆水故道也班固云信都縣故章河在北東入海酈道元注云衡漳水又北逕堂陽縣西分為二水其一水北出逕縣故城西其右水東北注出石門謂之長蘆水按衡漳故道遷流無定唐宋以來雖有長蘆胡盧之異名實皆漳水

下流也今漳水上流東徙經魏縣元城抵館陶入衛僅分一小支由廣宗至新河與滏合滏水會眾流由甯晉泊而出至州境合滹沱河東注謂之胡盧河并不得以漳水目之矣

西

棗強縣

繁波難西少北至州二十五里

有圈子古營流常蕭張四堡

漢置縣屬清河郡其地棗木強盛故名後漢廢晉復置屬長樂國後魏神瑞二年併入廣川太和二十二年復置屬長樂郡隋屬信都郡唐屬冀州宋熙甯元年省入信都十年復置仍屬冀州

漳水在縣東北自山東巨縣東行之一支也自廣平府清河縣流入與河間府故城縣接界又北逕武邑縣南入河間府界俗

亦謂之老漳河又古清河在縣南索盧河在縣西北十里古衛河分流也

縣故城在今縣東南金天會十年移今治漢廣川故城在縣東

三十里高隄廢縣平隄廢縣及後魏索盧廢縣並在縣東

武邑縣 疲難西南至州九十里 有劉中孫莊寨審婆趙橋四堡

漢置縣屬信都國後漢屬安平國晉太康十年置武邑郡後魏

皇始三年移郡治武強以武邑屬之北齊天保七年縣廢隋開

皇六年復置仍屬信都郡唐屬冀州元初屬東武州太宗六年

還屬冀州

夾河在縣北三十里亦漳水分流也自衡水縣流入又東入滹

沱河

武強湖在縣西北

漢觀津故城在縣東南東昌故城在縣東北

衡水縣 繁西南至州四十里 有張六留中二堡

漢信都國桃縣地隋初為信都下博武邑三縣地開皇十六年

始置衡水縣以衡漳故瀆得名屬信都郡唐屬冀州元改屬深

州

本朝初屬正定府後改屬

鹽河在縣西南二里許自州境流入北通漳河秋冬涸春夏則

溢其地生鹽故名

縣故城在今縣西南

趙州 衝繁 有馬驛一百尺口一鎮

原額人丁十五萬二千三百四十七 又滋生人丁一千二百四十五

春秋時晉地戰國屬趙秦為鉅鹿郡地漢為常山及鉅鹿郡地

後漢為常山國地晉為趙國地後魏始于平棘縣置趙郡屬殷
州隋開皇初郡廢十六年改置欒州大業初復為趙郡唐武德
初改曰趙州五年改曰欒州貞觀初復曰趙州天寶初又曰趙
郡乾元初復故屬河北道宋崇寧四年號慶源軍節度宣和元
年升慶源府屬河北西路金復曰趙州天德三年又改曰沃州
亦曰趙郡軍元復曰趙州屬正定路明洪武初以州治平棘縣
省入屬正定府

本朝雍正三年升為直隸州

州境

東西距一百五里
南北距一百二里
東至冀州新河縣界八十里
西至正定府元氏縣界二十五里
南至順德府唐山縣界八十二里
北至正定府欒城縣界二十里
東南至順德府鉅鹿縣治一百八十五里
西南至順德府邢臺縣界二百一十五里

八到

東北至正定府藁城縣界三十五里
西北至正定府元氏縣界二十五里
自州治至京師七百四十里

土貢

絲布絕 石榴 黛

管縣五

柏鄉 隆平 高邑 臨城 甯晉

淩水在州南自正定府欒城縣流入又東逕甯晉縣南合胡盧
河又清水河在州西一里至州東南合淩水古斯淩水在州北
亦自欒城縣流入又東入晉州界即白渠水也
平棘故城在州南漢宋子故城在州北敬武故城在州東北封
斯廢縣在州界

故欒城在州西北左傳哀公四年齊國夏伐晉取欒

柏鄉縣

衝繁北至州六十里

有馬驛一

本春秋晉鄙邑地漢置鄆縣屬常山郡又分置柏鄉侯國屬鉅鹿郡後漢建武初改鄆曰高邑省柏鄉縣入之屬常山國爲冀州刺史治晉初改屬趙國後魏屬趙郡北齊徙治房子縣界隋開皇十六年復于故高邑界置柏鄉縣屬欒州大業初屬趙郡唐屬趙州宋熙寧五年省爲鎮入高邑元祐初復置屬慶源府金屬沃州元明俱屬趙州

本朝初屬正定府雍正二年與隆平等四縣並還屬趙州

千金渠在縣西唐開元中縣令王佐所浚今廢又新溝河在縣北二十五里元貞間柏鄉尹曹貞自高邑北榆柳村開此溝經柏鄉以洩槐河諸水

縣故城在今縣西南與順德府唐山縣東西分界鄆縣故城在縣北

隆平縣簡北至州九十里

漢置廣阿縣屬鉅鹿郡後漢省後魏太和中復置又于縣置南鉅鹿郡後改爲南趙郡孝昌二年又置殷州齊天保二年避諱改曰趙州七年州廢隋初郡廢開皇十六年于縣置欒州仁壽元年改縣曰象城大業初州廢又改縣曰大陸屬趙郡唐武德四年復曰象城天寶元年又改曰昭慶屬趙州宋開寶二年又改曰隆平熙寧六年省爲鎮入臨城元祐元年復置屬慶源府金屬沃州元仍屬趙州明洪武初省入柏鄉十三年復置淦水一名淦陽河在縣東自順德府任縣流入又東北至寧晉縣東南匯于胡盧河廣阿澤在縣東北李吉甫云爾雅晉有大陸廣阿卽大陸別名淮南子曰鉅鹿大陸廣阿成一澤也

廣阿故城在縣東十二里又漢象氏廢縣在縣東北二十五里

高邑縣

簡東北至州五十里

有東驛頭武城韓家莊三堡

本戰國趙房子邑漢置房子縣屬常山郡晉于縣置趙國兼為冀州刺史治後魏屬趙郡北齊天保七年廢房子改置高邑縣仍屬趙郡隋初屬欒州尋屬趙郡唐屬趙州

沮水今名槐河自正定府元氏縣東流入縣北又東逕州西及柏鄉隆平縣北甯晉縣南合胡盧河又沛水在縣南二里東至柏鄉合槐河

房子故城在縣西南

臨城縣

簡東北至州九十里

有天臺青龍乞了鐵山四寨

本春秋晉臨邑漢為房子縣地北齊省房子隋開皇六年復置房子縣于此屬趙郡唐屬趙州天寶元年改曰臨城天祐二年

復曰房子五代後唐初復曰臨城

敦輿山在縣西南泚水所出

泚水自縣西南發源東南逕順德府內丘唐山二縣又東南入隆平縣南復入順德府界縣境沙河合泚水泥河至柏鄉合沛水

縣故城在今縣西南

甯晉縣

簡西北至州四十里

有奉城一鎮駒嶺賈家二口

漢置楊氏慶陶二縣屬鉅鹿郡後漢移郡治慶陶晉省楊氏入慶陶後魏永安二年分慶陶置慶遙縣北齊廢郡又省慶陶隋初屬欒州開皇六年又改慶遙曰慶陶大業初屬趙郡唐仍屬趙州天寶元年改曰甯晉

胡盧河在縣東南今名甯晉泊亦曰北泊周百餘里漳滏諸流

皆會于此又東北入冀州界按班志洺水石洺水俱至廩陶入
洺水注洺洺洺三水並缺惟有百尺溝南入洺湖注衡水叅攷
道里蓋寧晉泊即古洺湖也又滹沱河故道在縣東北明成化
八年由晉州紫城口南入甯晉泊正德中改由束鹿遂不入縣
境寢水今名讎河在縣東十里

廩陶故城在縣西南漢歷鄉故城在縣東二十五里隋大陸廢
縣在縣東南

和城在縣東北

深州 繁難 有馬驛一

原額人丁十九萬八千六百十八
又滋生人丁一千四百十九

禹貢冀州之域春秋時晉地戰國屬趙秦為鉅鹿郡地漢置下
博縣屬信都國後漢屬安平國後魏屬長樂郡隋屬信都郡唐

武德初屬冀州六年自信都移州治此貞觀元年還舊治以下
博屬深州十七年深州廢縣屬冀州先天二年又分置陸澤縣
仍置深州以下博屬之天寶初改饒陽郡乾元初復曰深州屬
河北道五代周顯德中分置靜安軍宋太平興國七年以下博
屬靜安軍雍熙二年軍廢以下博屬深州四年改下博曰靜安
移深州來治省陸澤入之屬河北西路金曰深州屬河北東路
元初屬河間府太宗十年改屬正定路明洪武初以州治靜安
縣省入

本朝雍正二年升為直隸州

州境 東西距一百二十三里

八到 南北距一百一十五里

東至河間府交河縣界六十八里
西至保定府束鹿縣界五十五里
南至冀州衡水縣界五十五里
北至保定府蠡縣界六十五里

東南至冀州武邑縣治六十里
西南至末鹿縣治六十五里
東北至河間府河間縣治一百六十里
西北至定州深澤縣治七十里
自州治至京師六百一十二里

土貢 絹 石榴 井泉石 鹽

管縣三

武強 饒陽 安平

胡盧河在州東南卽滹沱漳溢之會流自冀州衡水縣流入州界又東北逕武邑武強入河間府界又名清水河本漳水故道也又鴉兒河在州南二十里至獻縣合胡盧河
大陸澤在州北李吉甫云卽禹貢大陸澤縣因以名
下博故城及州故城在今州南唐陸澤故城在州北漢樂鄉故城及周靜安軍城在州東南

武強縣

難西至州五十里

有小范一鎮

漢置武隧縣屬河間國後漢曰武遂改屬安平國晉後又分置武強縣俱屬武邑郡後魏皇始二年徙武邑郡治武強神光二年省武強太和十八年復置北齊廢郡併武隧縣入武強隋屬信都唐武德四年屬冀州先天二年又屬深州開元二年復屬冀州永泰初仍屬深州唐末還屬冀州五代周又屬深州元初于縣置東武州太宗六年州廢還屬深州十一年改屬祁州中統二年改屬晉州

本朝初與饒陽安平二縣並屬正定府雍正二年並改屬深州武遂故城在縣東北縣故城有二俱在今縣南高齊移今治饒陽縣 疲難西南至州六十里 有劉木關殷村鄒村小堤 四堡

本戰國趙饒邑漢置饒陽縣屬涿郡後漢屬安平國晉屬博陵

國後魏屬博陵郡隋開皇三年屬定州十六年屬深州大業初改屬河間郡唐武德四年移深州治此貞觀十七年州廢還屬瀛州先天二年仍屬深州元改屬晉州

滋河在縣北舊自保定府祁州合沙唐二河逕縣北二十里明嘉靖間徙流蠡縣

本朝順治二三年皆入縣境又古饒河在縣西南應劭曰饒河縣在饒河之陽今堙古白馬河在縣南

縣故城有二一在今縣東一在今縣南隋蕪萁故城在縣東北安平縣疲南至州六十里 有子文店馬店新莊店三堡

漢置縣屬涿郡爲都尉治後漢改屬安平國尋屬博陵郡晉泰始初改置博陵國于此隋開皇初郡廢十六年于縣置深州大業初州廢屬博陵郡唐武德四年復置深州尋徙州治饒陽以

安平屬之貞觀十七年屬定州先天二年仍屬深州元太祖十九年于縣置南平州太宗七年復廢爲縣中統二年改屬晉州滹沱河舊自保定府束鹿縣流入縣南又東逕州北又東北逕饒陽縣入河間府界圖經河自宋熙甯以後往往決溢金元至明決徙數見明初自束鹿縣流逕深州抵衡水縣界入漳永樂四年北徙東流出武強縣界十六年又改逕衡水縣入漳成化八年改由晉州南入甯晉泊正德十三年紫城口淤分爲二股一仍南入甯晉泊一東由鴉兒河逕深州城南旣而二股合流由束鹿逕深州界至武強會清河後復自束鹿徙由深州北至武強北壞獻縣堤未幾復逕深州南東北入獻縣嘉靖三十七年又徙饒陽隆慶三年水決束鹿泛溢深州界萬曆中又北徙由深州北出饒陽天啟後漸徙而南

本朝順治二年由束鹿南歷冀州入漳而深州遂無水患又派水今謂之院西口河自祁州與唐滋二水合流至縣北下流入博野蠡縣界

漢穀丘故城在縣西南

定州 衝繁疲難 有馬驛一

原額人丁十三萬四千五百七十四
又滋生人丁一千八百七十七

禹貢冀州之域春秋鮮虞國地戰國為中山國地後屬趙秦為鉅鹿郡地漢高帝置中山郡景帝三年改中山國治盧奴縣屬冀州晉太元八年後燕慕容垂都此置中山尹後魏為中山郡皇始二年于郡置安州天興三年改曰定州高齊改州治盧奴縣曰安喜後周置定州總管府隋開皇初避諱改鮮虞郡郡尋廢大業初改定州曰博陵郡義甯初又改高陽郡唐武德四年

仍曰定州并置總管府天寶初復曰博陵郡乾元初復曰定州屬河北道建中四年置義武軍節度使宋亦曰定州博陵郡太平興國初避諱改軍名曰定武政和三年升為中山府屬河北西路金天會中復曰定州尋復為中山府元屬正定路明洪武初復改定州以州治安喜縣省入仍屬正定府

本朝雍正二年升為直隸州

州境 東西距一百三十里
南北距九十里

八到 東至保定府祁州界四十里
西至正定府阜平縣界九十里
南至正定府藁城縣界六十里
北至保定府慶都縣界三十里

東南至保定府東鹿縣界一百二十里
西南至正定府正定縣界一百四十里
東北至保定府唐縣治六十里
西北至保定府京師五百里

土貢

眼藥

綾

利米

鏡器

管縣二

曲陽 深澤

派水今名沙河在州南二十里自正定府阜平縣流逕曲陽縣西三十里又南逕正定之行唐新樂二縣乃至州境又東入保定府界又唐水盧奴水並在州北俱下注滹水

安喜故城在州東三十里漢新處故城在州東北

固城在州東樂陽城在州西唐城在州東北十五里

曲陽縣

簡東南至州六十里

有白道安一口軍城張公二寨

本戰國趙曲陽邑漢置上曲陽縣屬常山郡後漢改屬中山國晉仍屬常山郡後魏太平眞君七年省入新市景明元年復置屬中山郡北齊改曰曲陽隋開皇六年改曰石邑七年改曰恒

陽屬博陵郡唐初屬定州大歷三年屬泚州九年復屬定州元

和十五年復改曰曲陽金屬中山府元初置恒州立元帥府尋

復爲曲陽縣還屬中山府後又改屬保定路明初還屬定州

本朝初屬正定府雍正二年還屬

恒山在縣西北亦曰常山亦曰北嶽亘保定府西境及山西大

同府東境書舜典歲十有一月朔巡狩至于北岳禹貢太行恒

山周禮職方氏其山鎮曰恒山班固云上曲陽縣恒山北谷在

西北有祠并州山今北岳廟在縣治西距山百餘里又嘉山在

縣東十里

滹水今名唐河自保定府唐縣流入縣東又東南逕州北又東

入保定府祁州界又恒水在縣西禹貢恒衛旣從班固云恒山

北谷禹貢恒水所出東入滹縣境龍泉河長星溝亦注滹水靈

河水注派水

上曲陽故城在縣西

丹丘城容城並在縣西北

深澤縣

簡西北至州九十里

有大堡西內二堡

漢置縣屬中山國又置南深澤縣屬涿郡後漢省深澤以南深澤屬安平國晉屬博陵郡後魏曰深澤北齊廢隋開皇六年復置唐屬定州景福二年改屬祁州宋熙寧六年省為鎮八鼓城元祐元年復置元至元二年併入束鹿三年復置仍屬祁州本朝初屬保定府雍正十二年改屬定州

滹沱河在縣南圖經舊在縣東南十里今改流逕晉州故道猶存又滋河在縣西北八里自正定無極縣流入又東北入保定府界

南深澤故城在今縣東南三十五里

皇朝通志卷四

曾孫用懃校刊

